

informativni  
**bilten**



*Općine Hadžići*

Besplatan primjerk

Decembar 2017. Broj 27



# Tarčin Forest Resort & Spa

Općinsko vijeće  
Hadžići 2017



Infrastrukturni  
projekti 2017



Sjećanja



ISO 9001:2008  
BUREAU VERITAS  
Certification



✉ [ohadzici@bih.net.ba](mailto:ohadzici@bih.net.ba)

☎ +387 33 475 900 +387 33 475 952

YouTube





DECEMBAR,  
2017. godine

informativni  
**bilten**  
*Općine Hadžići*

**I M P R E S U M :**

**Izdavač:**

Općina Hadžići

**Bilten pripremio:**

Adnan Čolo

**Foto:**

Adnan Čolo

**Adresa:**

Hadželi 114  
71240 Hadžići  
Bosna i Hercegovina

**E-mail:**

ohadzici@bih.net.ba  
opcina.hadzici@gmail.com

**Web:**

www.hadzici.ba

**Kontakt informacije:**

+387 33 475 900  
+387 33 475 952

## OBAVIJEST



OBAVJEŠTAVA SE  
STANOVNIŠTVO OPĆINE  
HADŽIĆI DA JE U TOKU  
POSTAVLJANJE TABLICA SA  
KUĆNIM BROJEM I NAZIVOM  
ULICE NA TERITORIJI CIJELE OPĆINE

S obzirom na veliki broj novoizgrađenih objekata, veliki broj stanovnika koji su prijavljeni na broju „bb“, te proširivanje ulica novim krakovima, ukazala se potreba za novom numeracijom. Navedene aktivnosti su u skladu sa odlukama Općinskog vijeća. U cilju provođenja pomenutih odluka, uspostavlja se Adresni registar koji sadrži nazive ulica i kućne brojeve za stambene, poslovne i javne objekte. Prilikom postavljanja tablica sa kućnim brojem i nazivom ulice, obavijest o kućnom broju se uručuje vlasniku ili osobi koja trenutno koristi objekat. U slučaju odsustva pomenutih lica, ista se ostavlja u sanduče za poštu ili drugo uočljivo i pogodno mjesto.

Vlasnik ili korisnik objekta je dužan:

- omogućiti da se tabla sa nazivom ulice, odnosno tabla sa kućnim brojem postavi na njegov objekat;
- održavati čistom tablicu sa kućnim brojem i brinuti se da kućni broj bude vidljiv i čitak;
- obavijestiti nadležnu službu o oštećenju ili uništenju tablice sa kućnim brojem, u roku od 30 dana od dana nastanka oštećenja ili uništenja.

Naknadu za izradu i postavljanje tablice sa kućnim brojem i nazivom ulice, sve dok traje akcija uspostavljanja Adresnog registra, GRAĐANI NISU DUŽNI PLAĆATI. Nadzor nad provođenjem ovih odluka vrši kantonalni komunalni inspektor, u smislu otkrivanja protivpravnih radnji, kao što su:

- onemogućavanje postavljanja tablica sa nazivom ulice ili kućnim brojem;
- neovlašteno označavanje, skidanje, oštećivanje ili narušavanje izgleda tablice s kućnim brojem ili table sa nazivom ulice ili naseljenog mjesta.

Obavijest izdaje Služba za prostorno uređenje, urbanizam i građenje Općine Hadžići.





# HAMDO EJUBOVIĆ

## IZABRAN ZA PREDSJEDNIKA

### SAVEZA OPŠTINA I GRADOVA FBIH

Na Izornoj skupštini Saveza opština i gradova Federacije BiH, održanoj 5. maja 2017. godine u Čapljini, za predsjedavajućeg Skupštine Saveza izabran je načelnik Sanskog Mosta Faris Hasanbegović, a za njegovog zamjenika načelnik Čapljine Smiljan Vidić. Izabrano je i novo Predsjedništvo Skupštine Saveza općina i gradova Federacije BiH. Tako je za predsjednika Predsjedništva Saveza izabran načelnik Hadžića Hamdo Ejubović, a za njegovog zamjenika načelnik Tomislavgrada Ivan Vukadin. Svi načelnici su izabrani jednoglasno. Jednoglasno je usvojen Izvještaj direktorice Saveza općina i gradova Federacije BiH Vesne Travnjanin, te Izvještaj o radu organa i tijela skupštine Saveza. Na Skupštini je učestvovalo 47 načelnika / gradonačelnika ili njihovih predstavnika. Novo rukovodstvo naglasilo je kako će ustrajati u zaštiti interesa općina i gradova u saradnji sa višim nivoima vlasti. U svečanom dijelu sjednice prisutne je pozdravila predsjedateljica Doma naroda Parlamenta Federacije BiH Lidija Bradara. Na skupštini su, uz ostale, prisustvovali zamjenik šefa ureda Vijeća Evrope u Bosni i Hercegovini Toni Pavloski, predstavnici UNDP-a, OSCE-a i Federalnog ministarstva pravde, kao i predstavnici oba doma Parlamenta Federacije



BiH. Načelnici su imali priliku da se upoznaju sa novom Metodologijom za određivanje cijena usluga vodosnabdijevanja / vodoopskrbe i kanalizacije u BiH, koju je prezentovao Branko Vučijak iz UNDP-a BiH – projekat GoAL WaSH. Također, prezentovan im je i Regionalni program lokalne demokratije na Zapadnom Balkanu (ReLOaD), Zakon o razvojnom planiranju i upravljanju razvojem, te uvodna faza projekta jačanja kapaciteta saveza općina i gradova u BiH.





# TARČIN FOREST RESORT SVEČANO OTVOREN U PRISUSTVU BROJNIH ZVANICA



**M**Gallery by Sofitel, luksuzni brend vodeće svjetske hotelske grupacije AccorHotels i njenog strateškog partnera za region Orbis Hotel Group, u prisustvu brojnih zvanica svečano je 28.11.2017. godine obilježio otvaranje svoje jedinstvene nove lokacije u prirodnoj oazi Tarčin Forest Resort&Spa. Skupu su se obratili premijer Kantona Sarajevo Elmedin Konaković te načelnik Općine Hadžići Hamdo Ejubović izrazivši zadovoljstvo zbog realizacije ovako značajnog projekta. Enes Kazazić, direktor investitorske kompanije TIDC d.o.o. je u svom obraćanju govorio o jedinstvenom konceptu i ponudi resorta.

“Tarčin Forest Resort & Spa - MGallery by Sofitel je unikatan jer spaja luksuz vrhunske hotelske usluge i zdrav, sadržajan boravak u prirodi. Smješten u netaknutoj prirodi šumske oaze iznad Tarčina nadomak Sarajeva, okružen

sa četiri planine do kojih se iz resorta može stići za 20 minuta, resort je idealna odmorišna destinacije za sve one koji u vrlo kratkom roku i tokom cijele godine žele pobjeći od stresne svakidašnjice u gradu i posvetiti se emotivnoj i fizičkoj regeneraciji – od porodica sa djecom do poslovne klijentele. Osim što smo sa ovakvim konceptom željeli ponuditi sveobuhvatnu, unikatnu uslugu, tokom realizacije projekta smo se vodili i principima održivosti i doprinosa lokalnoj ekonomiji i zajednici – resort je građen u skladu sa najsavremenijim standardima očuvanja okoliša i to sa lokalnim izvođačima, saradujemo sa lokalnim dobavljačima organskih proizvoda za našu kulinarsku ponudu, a gotovo svih 60 uposlenih našeg tima su lokalno osoblje koje smo edukovali prema najvišim internacionalnim standardima i time ojačali njihovu poziciju na tržištu rada i dugoročnu perspektivu u hotelijerskoj branši”, rekao je Kazazić.





- Zahvaljujem se investitorima što su odabrali općinu Hadžići za realizaciju ovog lijepog i značajnog projekta. Općina Hadžići spada u red najljepših općina ne samo u BiH već i u regionu, što strani investitori svakako prepoznaju, kazao je načelnik Ejubović.

“Ovdje je uposleno 60 ljudi. Ovo je ozbiljna brojka za jedan ovakav projekat. Za Sarajevo kao turističku destinaciju koja je po mnogim parametrima svjetskih turističkih asocijacija jedan od najbrže rastućih gradova u svijetu jako puno znači s aspekta turizma. Ovako arhitektonsko zdanje sigurno će ubrzo naći mjesto i na razglednicama koje se šalju iz Kantona Sarajevo kao jedan od rariteta ili naših ljepota”, kazao je Konaković.

Tarcin Forest Resort u ponudi ima 55 hotelskih soba i 20 vila sa privatnim baštama, od kojih devet

pripada hotelu sa cjelovitom hotelskom uslugom dok su ostale vile na raspolaganju za iznajmljivanje i prodaju. Vanjska infrastruktura obuhvata 350 hiljada kvadratnih metara uključujući otvoreni bar u borovoj šumi i dječije igralište uz ponudu čitavog niza sportskih i rekreativnih sadržaja poput jahanja, planinarenja ili vožnje kvadova. Hotel veličine 85 hiljada kvadratnih metara sadrži najmodernije konferencijske kapacitete, luksuzni spa&wellness te fitness centar, dok su u restoranu u ponudi ekskluzivne internacionalne i lokalne kreacije organskih jela.

Projekat vrijedan 30 miliona KM je očito već prepoznat od strane posjetioca i gostiju – od oficijelnog otvaranja hotela 10.11. ove godine, svi kapaciteti hotela su već bili bukirani od strane korporativnih grupa, a prve vile su iznajmljene za novogodišnje proslave.







# RAD OPĆINSKOG VIJEĆA HADŽIĆI U 2017. GODINI

Općinsko vijeće Hadžići je tokom 2017. godine održalo ukupno deset redovnih sjednica. Na sjednicama su razmatrani materijali planirani Programom rada Općinskog vijeća Hadžići. Za sve materijale obrađivači su bile, uglavnom, nadležne Općinske službe, a predlagač Općinski načelnik, osim materijala kada je posebnim propisom utvrđen ovlašten predlagač. Osim redovnih sjednica Vijeća održane su još Svečana sjednica povodom obilježavanja 1. marta - Dana nezavisnosti BiH i 6. marta - Dana Općine Hadžići i Svečana akademija povodom 25. novembra - Dana državnosti BiH te Svečani prijem Općinskog načelnika i predsjedavajućeg Općinskog vijeća povodom Nove godine. Na redovnim sjednicama Vijeće je razmotrilo dostavljene materijale koji su se odnosili na odluke i rješenja, planove i programe, izvještaje i informacije te izbore i imenovanja. Tematskih i vanrednih sjednica nije bilo. Godina 2017. je bila posebno značajna u radu Vijeća jer se osim usvajanja Odluke o izmjenama i dopunama Budžeta Općine Hadžići, usvajaju dva važna

dokumenta za daljnji razvoj Općine Hadžići: Odluka o usvajanju Strategije razvoja Općine Hadžići za period 2017-2021. godine i Odluka o usvajanju Strategije za mlade Općine Hadžići za period 2017-2020. godine. Komisije Vijeća su, svaka u okviru svoga djelokruga rada, dale značajan doprinos u pripremi sjednica Vijeća i to svojim mišljenjima, prijedlozima, sugestijama i prijedlozima zaključaka. Tokom 2017. godine radna tijela Vijeća su održala ukupno 38 sjednica.

U februaru mjesecu 2017. godine održana je uvodna obuka za vijećnike/ce Općinskog vijeća Hadžići „Šta vijećnici treba da znaju o lokalnoj samoupravi“ od strane Saveza općina i gradova u Federaciji Bosne i Hercegovine. Ovu obuku je pohađalo 18 vijećnika.

Na Sedmoj sjednici Općinskog vijeća Hadžići vijećnici su upoznati sa Odlukom Centralne izborne komisije BiH o prestanku mandata vijećniku Stranke demokratske akcije Proha Adnanu i dodjeli mandata sljedećem kvalificiranom kandidatu sa liste istog političkog







subjekta Čorbo Adnanu. Tom prilikom je Adnan Proha razriješen dužnosti predsjedavajućeg Općinskog vijeća Hadžići, a tu funkciju Odlukom o imenovanju predsjedavajućeg Općinskog vijeća Hadžići od 27.04.2017. godine uspješno obnaša Senad Kovačević.

Općinsko vijeće Hadžići na Devetoj sjednici usvaja Odluku o izmjenama i dopunama Poslovnika Općinskog vijeća Hadžići kojom se značajno pravno definišu rad i organizacija Općinskog vijeća. Također, na ovoj sjednici vijećnici usvajaju i Odluku o verifikaciji mandata izabranih članova Savjeta mjesnih zajednica u Općini Hadžići za mandatni saziv 2017-2021. godine.

Posebno je važno istaći usvajanje Budžeta Općine Hadžići za 2018. godinu te Regulacionog plana „Privredna zona Hadžići“.

Budžetom Općine Hadžići za 2018. godinu Općina Hadžići nastavlja trasirati uspješan put stabilne poslovne sredine i pokazuje dobro planirane ekonomske pokazatelje koje se u konačnoj realizaciji ostvaruju u zavidnim procentima.

Usvajanje Regulacionog plana „Privredna zona Hadžići“, proizvodno - prodajno - skladišne zone, utvrđuju se izvrsni uslovi za razvoj privrede na području općine Hadžići i za zapošljavanje stanovništva. Urbanim uređenjem prostora bivše PDI „Bjelašnica“ dat je planski pristup izgradnji i korištenju prostora te definisanju grana privrede koje se mogu obavljati u ovoj zoni te načinu zaštite okoliša, zdravlja i sigurnosti ljudi.

Usvajanjem Odluke o građevinskom zemljištu i seta drugih odluka iz ove oblasti navedene odluke se usklađuju sa zakonskim i planskim aktima. Time je stvoren odličan osnov za potencijalne investitore. Na ovaj način općina Hadžići i dalje ostaje mjesto povoljnog ulaganja i građenja, a sve u cilju napretka i razvoja općine u oblasti privrede i turizma.

Općinsko vijeće Hadžići je tako u 2017. godini skoro u potpunosti realizovalo svoj Program rada poštujući nadležnosti utvrđene zakonom i Statutom Općine Hadžići, a sve za dobrobit građana općine Hadžići i u interesu zajedničkog dobra.





## Asfaltiran put Jeleč-Ljubovčići

Građevinsko preduzeće “Bucomerc” d.o.o Kiseljak 21. juna 2017. godine okončalo je poslove asfaltiranja 1,3 kilometra duge dionice Jeleč-Ljubovčići. Širina asfaltne kolovozne trake iznosi šest metara. Zbog neriješenih imovinskih odnosa dionica od 60 metara, u selu Jeleč, široka je 5,2 metra. Odvodnja je riješena kombinovano oborinskom kanalizacijom i asfaltnim rigolima. Javno komunalno preduzeća “Komunalac” Hadžići prethodno je u trup puta ugradilo kanizacionu mrežu.

- Izgradili smo moderan, šest metara širok asfaltni put od Kahrimana do Ljubovčića. To je dionica duga skoro tri kilometra. Hvala građanima na

strpljenju koje su pokazali u proteklom periodu. Napominjem da je u trup puta ove dionice ugrađen novi kanizacioni sistem. Urađena je i rasvjeta. Postavili smo dovoljan broja kontejnera i redovnim odvozom smeća ovo će biti čista životna sredina. Poslove, koji su izuzetno skupi, moramo raditi postepeno, sistemski i kvalitetno. Ovaj dio općine sada je otvoren da se iskoristi ogromni turistički potencijal sjevernih padina planine Bjelašnice, kazao je Općinski načelnik Hamdo Ejubović. Radove su finansirali Općina Hadžići, Ministarstvo privrede Kantona Sarajevo te Direkcija za ceste Kantona Sarajevo.



## Asfaltiran put u Kahrimanima

U Mjesnoj zajednici Pazarić, naselje Kahrimani, asfaltiran je put ukupne dužine 800 metara. Širina asfaltne kolovozne trake iznosi tri metara sa obostranim bankinama 0,5 metara.

Prethodno je u trup puta položen novi vodovodni sistem i glavni fekalni kolektor za naselje Pazarić. Izvođač radova je JKP “Komunalac” Hadžići, a finansijer Općina Hadžići.







## Asfaltiran put za Ušivak

U Mjesnoj zajednici Donji Hadžići završeni su radovi na rekonstrukciji i izgradnji dijela saobraćajnice i oborinskog kanalizacionog kolektora prema naselju Ušivak. Asfaltirana je

dionica duga 780 metara širine četiri metra. Radove je izvodilo preduzeće “Bucomerc” d.o.o., a finansirala Općina Hadžići.



## Asfaltiran put u Binježevu

U Mjesnoj zajednici Binježevo, naselje Začuprija, izvršena je rekonstrukcija i asfaltiranje puta na dužini od 380 metara. Širina asfaltnog kolovoza iznosi tri metra sa proširenjem

na krivini kod željezničkog mosta. Izvođač radova je preduzeće “Sarajevo putevi”, a finansijer Općina Hadžići.





## Asfaltiran put u Korči

U Mjesnoj zajednici Duranovići, naselje Korča, asfaltirano je 1.500 metara saobraćajnice od mesdžida do autobuske okretaljke, kolovozne

širine cca 4 metara. Prethodno je u trup puta postavljena fekalna kanalizaciona mreža.



## Infrastrukturni radovi u Bjelašničkoj ulici

Javno komunalno preduzeće “Komunalac” Hadžići završilo je radove na rekonstrukciji vodovoda Kradenik i izgradnji sekundarne kanalizacione mreže u Bjelašničkoj ulici u Pazariću. Postavljeno je 320 metara kanalizacionih cijevi koje će biti priključene na glavni fekalni

kolector Hadžići-Resnik. Na dužini od 550 metara izvršena je zamjena starih azbestnih vodovodnih cijevi, a postavljene su ekološki prihvatljive daktilne cijevi. Radove finansira Općina Hadžići i JKP “Komunalac” Hadžići.







## Izgrađena kanalizaciona mreža Brezovačka-Žunovnica

Radnici JKP "Komunalac" Hadžići sredinom aprila 2017. godine završili su radove na izgradnji kanalizacione mreže na dionici

Brezovačka-Žunovnica. Na dužini od 300 metara postavljena su reviziona okna i cijevi promjera Ø 300. Investitor radova je Općina Hadžići.



## Završen priključak na M-17 u Industrijskoj zoni Mrđanović polje

Projektom izgradnje nove ceste u naselju Donji Hadžići u septembru prošle godine izgrađen je most preko rijeke Zujevine koji povezuje Industrijsku zonu Mrđanović polje sa magistralnim putem M-17. Nedavno je završen i priključak na magistralni put čime su Hadžići

između ostalog dobili alternativni putni pravac u slučaju eventualnih obustava saobraćaja na potezu Dupovci-Mostarsko raskršće. Radove su finansirali Općina Hadžići i Ministarstvo privrede Kantona Sarajevo.







## Izgradnja feklanog kolektora Tarčin-Gornja Bioča

Radnici Javnog komunalnog preduzeća “Komunalac” Hadžići izvode radove na izgradnji fekalnog kolektora Tarčin-Gornja Bioča ukupne dužine 3050 metara.

- Odradili smo veliki dio posla na ovoj dugoj dionici. Fekalni kolektor će u skorijoj budućnosti biti prikopčan na planirani prečistač otpadnih voda kao i svi sekundarni vodovi kanalizacione mreže u Tarčinu. Naše ekipe u isto vrijeme rade

kanalizacioni sistem od magistralnog puta M-17 u Binježevu prema naselju Miševići ukupne dužine 900 metara. S obzirom da se ova dionica asfaltira iskoristit ćemo priliku da rekonstruišemo i vodovod na dužini od 430 metara, te vodovod Malotina na dužini od 200 metara, kazao je direktor “Komunalca” Nusret Kaleta.

Sve radove finansira Općina Hadžići.



## Asfaltiran put Kazina Bara - Vilovac

Radnici JKP “Komunalac” Hadžići sfaltirali su dionicu puta od Kazine Bare prema hotelu MGallery by Sofitel Tarčin dugu 1,2 kilometra. Širina asfaltne kolovozne trake iznosi šest metara. Prethodno je u trup puta postavljena kanalizaciona i vodovodna mreža. Radove je finansirala Općina Hadžići.







## FK Radnik: Sedam apartmana, restoran i kuhinja kluba za novu sezonu

Sportski kapaciteti i infrastruktura Fudbalskog Kluba "Radnik" Hadžići i u ovoj godini su poboljšani. Općina Hadžići je izdvojila 57.000 KM za opremanje sedam apartmana u objektu te nabavku i ugradnju opreme za restoran i kuhinju kluba. Završen je priključak fekalne kanalizacije

dijela objekta, a sve radove izvodi preduzeće "Music Company" Hadžići. U zadnje dvije godine Općina je uložila u poboljšanje uslova stadiona preko 240.000 KM. Veliki broj premijerligaša u BiH može pozavidjeti kapacitetima s kojima raspolaže naš klub



## Dom zdravlja Hadžići u novom ruhu

Nakon završetka radova na rekonstrukciji krova, postavljanju termoizolacione fasade i zamjeni dotrajale vanjske stolarije, Dom zdravlja Hadžići dobio je novi, ljepši vanjski izgled. Ukupna vrijednost radova iznosila je 289.000 KM. Općina Hadžići je projekat sufinansirala sa 88.000 KM. Ovaj posao je završen u okviru

projekta "Zeleni ekonomski razvoj – Povećanje energetske efikasnosti u javnom sektoru u BiH" kojeg provode UNDP, Kanton Sarajevo i Općina Hadžići. Općina Hadžići će i dalje nastaviti sa podrškom Domu zdravlja Hadžići i područnim ambulantomama s ciljem poboljšanja kvaliteta zdravstvenih usluga građanima naše općine.







## Planinarski dom Brezovača, biser Igmana

Članovi planinarskog društva “Brezovača” Hadžići okončali su poslove na uređenju smještajnih kapaciteta tako da ovaj dom sada raspolaže sa 36 kreveta, četiri kupatila i šest mokrih čvorova. Ove radove, kao i mnoge prethodne, finansirala je Općina Hadžići. Planinarski dom je omiljena destinacija mnogih planinara. Nalazi se u podnožju planine Igman, daleko od gradske buke, a njegova vrata otvorena su za sve posjetioce. Do doma se laganim hodom iz Hadžića može stići za dva sata. Odatle posjetioци mogu obići Golo brdo i Malo polje na Igmanu, do kojih se može stići za sat i po.



## MZ TRZANJ: Izgrađeno spomen-obilježje i dječiji park

Nakon izgradnje sportskog igrališta sa tribinama u Mjesnoj zajednici Trzanj, nastavljeni su radovi na uređenju i oplemenjivanju ovog prostora. Igrađeno je spomen-obilježje

poginulim pripadnicima MUP-a i ARBiH te dječije igralište sa mobilijarom. Uskoro će biti postavljena ograda oko ovog kompleksa.







## KOMUNALAC OPREMLJEN specijalnim vozilom vrijednim 283.000 KM

Direktor Kantonalne uprave civilne zaštite Mustafa Kovač i direktor JKP Komunalac "Hadžići" potpisali su 2. augusta ugovor o primopredaji specijalnog vozila za probijanje kanalizacije i usisavanje kanizacionog mulja vrijednog 283.000 KM. Činu potpisivanja prisustvovali su još između ostalih komandant Štaba civilne zaštite Kantona Sarajevo Senad Hasanspahić i načelnik Općine Hadžići Hamdo Ejubović te ministar saobraćaja Kantona Sarajevo Mujo Fišo.



- Želim da se zahvalim Vladi Kantona Sarajevo na ovom vozilu koje nam je bilo neophodno s obzirom da u našem voznom parku imamo dva dotrajala vozila ove vrste stara 37 i 24 godine. Naše preduzeće održava 40 kilometara kanizacione mreže te oko 1.000 septičkih jama na godišnjem nivou. Između ostalog ovo vozilo možemo koristiti u slučaju elementarnih nepogoda, kazao je direktor JKP "Komunalac" Nusret Kaleta.



## Nove prostorije za izradu adresnog registra

U prostorijama Kulturnog centra Hadžići otvoren je ured koji će u narednom periodu imati zadatak da uspostavi adresni registar za područje općine Hadžići. Uspostavom adresnog registra sve stambene jedinice u svim hadžićkim naseljima imat će kućne brojeve te će se uspostaviti elektronska baza sa osnovnim podacima i grafičkim prikazom (GPS podacima) svih objekata (geoinformacioni sistem). Najveću korist od ovog projekta imat će hitna pomoć,

vatrogasci, poštanska služba, policija dok će se u isto vrijeme kompletirati sistem navigacije za našu općinu. Uspostava adresnog registra velika je pomoć općinskim službama koje kroz lokalnu mrežu mogu pristupiti servisu i pregledati prostorne podatke. Ovim projektom bit će implementirane Odluka o određivanju granica svih ulica na području općine Hadžići te Odluka o imenovanju 149 ulica koje je usvojilo Općinsko vijeće.





## Dom zdravlja dobio najmoderniji ultrazvučni aparat

U prostorijama Doma zdravlja Hadžići 3. marta potpisan je ugovor o darivanju dijagnostičnog ultrazvučnog aparata vrijednog 48.000 KM. Ugovor su potpisali Općinski načelnik Hamdo Ejubović, direktor Hoše Komerca Izet Bozalija kao donatori i predstavnik Doma zdravlja doktor Fikret Ramić.

- Drago mi je što svoje dobro mogu podijeliti sa svojim narodom, a posebno mi je drago što se radi o aparatu za dijagnostiku, koji će na vrijeme otkrivati i sprječavati neželjene posljedice našim građanima. Posebno je bitno što se ovaj aparat može nadograđivati i koristiti za dijagnosticiranje raka dojke, kazao je direktor "Hoše Komerca" d.o.o. Izet Bozalija.



## Donirana informatička oprema Zavodu za zaštitu žena i materinstva

Općina Hadžići donirala je informatičku opremu vrijednu 7.000 KM Zavodu za zaštitu žena i materinstva Kantona Sarajevo, lokalitet Hadžići. Ugovor u Domu zdravlja Hadžići potpisali su Općinski načelnik Hamdo Ejubović i direktor Zavoda dr. Mithat Kurtović.

- Zahvaljujući spremnosti i dobroj organizovanosti jedne Općine na čelu sa načelnikom Ejubovićem,

mi smo sada potpuno opremljeni za pružanje primarne ginekološke zdravstvene zaštite našim pacijentima. Ova računarska oprema je zadnja karika u lancu elektronskog povezivanja zdravstvenih ustanova, kazao je Prim. mr.sci.dr. Mithat Kurtović, direktor Zavoda za zaštitu žena i materinstva Kantona Sarajevo.







## Općina Hadžići donirala savremenu medicinsku opremu Domu zdravlja



Općina Hadžići donirala je savremeni aparat za dvokanalnu elektroterapiju Odjelu fizikalne medicine i rehabilitacije Doma zdravlja Hadžići. Ukupna vrijednost ove medicinske opreme iznosi 5.000,00 KM. Općina Hadžići će i dalje nastaviti sa podrškom Domu zdravlja Hadžići i područnim ambulantama s ciljem poboljšanja kvaliteta zdravstvenih usluga građanima naše općine.



## Fahri Bećiroviću uručeno ortopedsko pomagalo

Dana, 1.2.2017. godine u atriju OŠ „6.mart“ Hadžići, realizovan je jedan od ciljeva projekta „Champs“ (Djeca protiv mina) pod pokroviteljstvom MLI i MDDC. Učenici škole,

njih 14, zajedno sa nastavnicom Lejлом Ljubović i upravom škole uručili su ortopedsko pomagalo našem sugrađaninu i bivšem učeniku gospodinu Fahri Bećiroviću.



## Horman Fadilu uručen stepper

Predstavnici Općine Hadžići polovinom februara posjetili su našeg sugrađanina Horman Fadila iz Tarčina. Tom prilikom Fadilu, koji je obolio od distrofije mišića, uručen je stepper,

tanžer. Ovaj stepper je inače sportsko pomagalo koje će oboljelom pomoći u svakodnevnom životu te spriječiti napredovanje njegove bolesti.





## Predstavnici "Let's Do It" organizacije uručili zahvalnicu načelniku Ejuboviću



Organizatori akcije „Let's Do It” - očistimo Zemlju za 1 dan Hadžići, Nusejba Hadžić i

Rijad Bajrić uručili su u zgradi Općine Hadžići zahvalnicu Općinskom načelniku Hamdi Ejuboviću za nesebičnu pomoć pri realizaciji akcija čišćenja na području Hadžića. Analizirani su efekti održanih akcija čišćenja u protekle dvije godine te je konstatovano da su ostvareni pozitivni rezultati te da je animiran veliki broj omladine u volonterskim akcijama čišćenja. Predstavnici Općine su izrazili zadovoljstvo zbog pozitivnih rezultata i animiranja brojnih učesnika svih životnih dobi u ovoj značajnoj akciji. Radujemo se budućim projektima i saradnji.

## Posjeta načelnika Općine Hadžići JU Zavodu Pazarić

Sa željom da obraduje korisnike i sazna što više o novim realiziranim projektima, naša Ustanova je posjetio načelnik Općine Hadžići Hamdo Ejubović sa pomoćnikom Izetom Korom i savjetnikom za informisanje Adnanom Čolom. Kako je naglasio načelnik Ejubović, saradnja sa JU Zavodom Pazarić je uvijek bila značajna za Općinu Hadžići, s obzirom da je i cilj lokalne zajednice u skladu sa mogućnostima stvarati što bolje uslove života ljudima sa poteškoćama u razvoju. Ovom prilikom načelnik Ejubović je

obradovao korisnike uručivši 340 slatkih poklona.

Općina Hadžići je obezbijedila finansijsku podršku za opremanje namještajem najvećeg objekta sa 10 apartmana u ovom naselju. Zahvaljujući finansiranju Općine Hadžići u JU Zavodu Pazarić pokrenuta je prije deceniju i stolarska radionica, koja je napravila krevete i ugradbene plakare spavaćih soba u novosagrađenim objektima.

(Sabina Čajić, PR JU Zavod za zbrinjavanje mentalno invalidne djece i omladine Pazarić)





## Održan IX festival rada srednjih tehničkih i stručnih škola BiH

U subotu 6. maja 2017. godine u Hadžićima je održan IX festival rada srednjih tehničkih i stručnih škola BiH koji je okupio 70 srednjih škola iz cijele države i omogućio takmičenje za preko 800 mladih u 54 zanimanja i stručna zvanja. Organizator Festivala je Udruženje nastavnika i saradnika srednjih tehničkih i stručnih škola FBiH, a domaćini su bili Srednja škola Hadžići i Općina Hadžići. Festival je podržala Švicarska agencija za razvoj i saradnju u BiH (SDC) putem Programa „Prilika Plus“ koji implementira Republička agencija za razvoj malih i srednjih preduzeća, a partneri Festivala su bili još i 66 lokalnih kompanija. Festival je bio od velike važnosti kako za mlade u srednjim tehničkim i stručnim školama da se podrže u razvoju, dodatno motiviraju i bolje uvežu sa preduzećima i kasnije lakše nađu posao, ali i za promociju ovih zanimanja koja se traže danas na tržištu rada. Ovo je značajno posebno kada znamo da je 63% mladih u BiH nezaposleno. Svečano otvaranje Festivala je održano u Sportskoj dvorani u Hadžićima. Takmičenja su bila raspoređena na nekoliko lokacija (elektrotehničari – Osnovna škola 6. mart Hadžići; pekar, slastičar, kuhar i konobar – hotel GastroID; automehaničar i metalostrugar – Tehnički remontni zavod Hadžići, voćar/vinogradar – Voćnjak Hadžići; vozač motornih vozila – Poligon Hadžići, veterinarski tehničar – Veterinarska stanica Hadžići, ostala zanimanja – Srednja škola Hadžići). Paralelno sa takmičenjem u multimedijalnoj sali općine Hadžići održan je okrugli stol na temu: “Praktična nastava u srednjim tehničkim i stručnim školama: Na putu ka jakom partnerstvu sa preduzećima”. Cilj okruglog stola je definisanje pojedinačnih uloga i odgovornosti ključnih aktera, kako bi se u narednom periodu unaprijedio nastavni proces kroz otvaranje mogućnosti sveobuhvatnijeg uključivanja preduzeća u provođenje jednog dijela praktične nastave, te adekvatnijeg dizajniranja obrazovnih programa na svim nivoima, a posebno u kontekstu cjeloživotnog učenja.








## Novo prodajno mjesto GRASA u Hadžićima

Unovoizgrađenom poslovnom objektu u ulici Hadželi, u centru Hadžića, JKP GRAS u julu je svečano otvorio novo prodajno mjesto gdje će građani moći kupiti karte, kupone te dobiti sve neophodne informacije o redu vožnji.

Vrijednost objekta kojeg je finansirala Općina Hadžići iznosi 50.000,00 KM. Iz preduzeća GRAS su naglasili kako je ovo veliki korak u spašavanju GRAS-a.

Općina Hadžići je donacijom ovog objekta olakšala građanima nabavku karata te sačuvala mnoga radna mjesta.



## Dodijeljeno 87 stipendija za učenike i studente

Općina Hadžići i ove godine dodjeljuje stipendije za učenike i studente. U skladu sa odredbama Odluke o stipendiranju učenika i studenata i važećim Odlukama Općinskog načelnika za ovu školsku/akademsku godinu dodijeljeno je 87 stipendija, od čega 42 za

učenike i 45 za studente. Visina stipendije za srednjoškolce iznosi 50 KM, a za studente 100 KM mjesečno. Ugovore o stipendiranju učenicima i studentima svečanosti u multimedijalnoj sali Hadžići dodijelili su Općinski načelnik Hamdo Ejubović i predsjedavajući Općinskog vijeća.





## Muzičkoj školi u Hadžićima donirana oprema vrijedna 27.000 KM

U oktobru ove godine oko pedesetak osnovaca krenulo je u prvi razred Osnovne muzičke škole Ilidža, područno odjeljenje – Hadžići. Općinski načelnik Hamdo Ejubović je za potrebe škole donirao opremu vrijednu 27.000 KM direktorima OŠ “6. mart” Hadžići i Osnovne muzičke škole Ilidža, Muhamedu Čoviću i Dijani Preljević. Od muzičkih instrumenata i opreme je nabavljeno: dva klavira, dvije harmonike, dvije gitare, muzička linija,

orfov set, stalak za note, školska tabla, muzička tabla sa notnim sistemom, izložbena vitrina za instrumente i dr. Resorno ministarstvo je za ovaj projekat provelo neophodnu proceduru i obezbijedilo nastavni kadar. Za šestogodišnje muzičko obrazovanje je propisan uzrast – „upisuje se učenik mlađi od devet godina života“, za instrumente: klavir, violina, violončelo, gitara, harmonika, harfa i flauta.



## Škola plivanja za hadžićke osnovce

Općina Hadžići u saradnji sa Javnim preduzećem „Olimpijski bazen Otoka“, Ministarstvom za obrazovanje, nauku i mlade te Ministarstvom kulture i sporta KS omogućava besplatnu obuku plivanja učenicima osnovnih škola. Osim izdvojenih novčanih sredstava ministarstava i Općine za časove plivanja,

obezbijeđen je prevoz za učenike od škole do bazena i nazad, u pratnji nastavnika/ica razredne nastave. U periodu od 30.10. do 10.11. 2017. godine 60 učenika OŠ “6.mart” Hadžići na Olimpijskom bazenu Otoka pohađalo je “Školu plivanja”.







## Općina Hadžići dodijelila 25.000 KM za 18 projekata mladih

Na osnovu Odluke o kriterijima, načinu i postupku raspodjele sredstava iz granta za projekte mladih koji se finansiraju i sufinansiraju sredstvima budžeta Općine Hadžići te na osnovu prijedloga Komisije za odabir projekata za finansiranje i sufinansiranje iz sredstava budžeta Općine Hadžići, Općinski načelnik je donio Odluku o dodjeli 25.000 KM za 18 projekata. Na osnovu bodova ostvarenih ocjenjivanjem svakog člana Komisije pojedinačno, zaključeno je da je od pristiglih 31 prijave, eliminatorne kriterije zadovoljilo 31 projekat. S obzirom da je ukupno bilo moguće osvojiti 250 bodova, ocjenjeno je da se sredstva dodijele onim aplikantima čiji su projekti osvojili preko 50%

mogućih bodova (125 bodova i više), te je podržano 18 projekata. Sredstva su dodijeljena: Udruženju ljubitelja ekstremnih sportova "Limit", Udruženju oboljelih od tumora "Rubin" Hadžići, FK Radnik, RK Hadžići, Udruženju za afirmaciju kulture i umjetnosti "Ars Populi" Hadžići, JU KSIRC Hadžići, Udruženju radio-amatera radio klub "Futuro" Hadžići, VD Tarčin, PSD Brezovača, KUD Ivan planina, KUD Igman, Udruženje mladih "Idila", ATBV "Defendo", Neformalna grupa, KBS "Wizard" Hadžići, Udruženje pčelara "Koščan", Fondacija "Zaboravljena avlija", Medžlis Islamske zajednice za džemat Hadžići.

## Općina Hadžići angažovala 17 volontera

U Općini Hadžići 10. maja je 17 mladih ljudi sa visokom školskom spremom potpisalo ugovore da narednu godinu volontiraju u općinskim službama i školama na području općine Hadžići. Za volonterski rad volonteri će imati pravo na novčanu naknadu u iznosu od 35% od početne osnovne plaće utvrđene za radno mjesto stručnog saradnika u skladu sa članom 26 Zakona o plaćama i naknadama u organima vlasti u Federaciji BiH. Volonterski rad obavljaju: Kardaš Almir, Selimović Alisa, Tiro Lejla, Teftedarija Đejna, Karahodžić-

Camo Mersiha, Kalem Melina, Čičko Emina, Mujić Emina, Rahmanović Adi, Koro Amira, Hasanović Lejla, Krčalo Sanda, Poljo Emra, Mehić Begić Almedina, Šarenac Žarko, Uzun Enis i Čaušević Anela.

Kroz Jedinostveni općinski organ uprave Općine Hadžići i škole na području općine Hadžići u periodu od 2007. godine do 2017. godine obuku, stručno usavršavanje je prošlo preko 150 volontera. Za tu namjenu Općina Hadžići je izdvojila blizu milion maraka.







## Ulica „Zlatnih ljiljana“

Tabla sa nazivom ulice “Zlatnih ljiljana” i brojem 57 postavljena je 30. oktobra na Novu osnovnu školu “Hadžići”. Na ovaj način zvanično je počela akcija formiranja jedinstvenog adresnog registra Općine Hadžići u sklopu CILAP projekta kojeg implementiraju Općina Hadžići i Federalna geodetska uprava iz sredstava koje je odobrila Kraljevina Švedska. U narednom periodu bit će postavljeno preko 11.500 tabli za nazivima ulica i kućnim brojem na one objekte koji podliježu numeraciji.

- Kontinuirano ćemo obilježavati ulicu po ulicu i naseljeno mjesto po naseljeno mjesto. Kada bi radili svaki dan i kada bi uslovi bili idealni ovaj posao bi mogli završiti za nekih šest mjeseci. Radove izvodi naše preduzeće “Savico” koje izrađuje table i postavlja ih, kazala je Alma Izmirlija iz Službe za prostorno uređenje, urbanizam i građenje.

Ono što bi građani trebali znati jeste da nakon numeracije i obilježavanja ulica nisu dužni mijenjati lične dokumente niti će imati potrebu izdvajati bilo kakva finansijska sredstva. Građanska dužnost je da se nakon numeracije u MUP-u prijavi promjena broja prebivališta za svoju porodicu. Apelujemo još jednom da građani omoguće izvođaču postavljanje kućnog broja.

Nazivi ulica:

Hadželi, Džamijska, Zlatnih ljiljana, 6. mart, XII hercegovačka, Ban brdo I, Ban brdo II, Ceribašino, Novo naselje, Novo naselje I, Novo naselje II, Kućice I, Kućice II, Utržje, Omladinska, Dupovci, Dupovci I, Dupovci II, Grivići, Stari Grivići, Sajnica, Vihrica, Vrbica, Bare, Bare I, Put za Gajice, Vrančići - Novo naselje, Vrančići I, Vrančići, Igmanski put, Gačani, Milinjača, Milinjača I, 5. april, Žunovačka, Igmanska, Igmanska I, Brezovačka, Rije, Veksel, Žunovačka I, 27. juli, Stara pruga, Tinohovska, Iznad pruge, Stari put, Strma, Kasatići, Dubravice, Kasatići - vikend - naselje, Kasatići - Prohe, Kasatići - Brca, Donji Hadžići - iza pruge, Sutice, Kopišan, Kopišan I, Kopišan II, Kasarna, Bjelotine, Ulica lipa, Ušivak, Dedin put, Donji Musići, Musići, Stari Ušivak, Put spasa, Donji Hadžići, Patriotske lige, Hrnjići, Začuprije, Močila, Boce, Mostarsko raskršće, Binježevo, Toviš, Kukrika,



Kukrika I, Kukrika II, Malotina, Malotina I, Malotina II, Dobrijevac, Dobrijevac I, Industrijska, Industrijska zona Garovci, Garovci, Put za Stublove, Podvode, Stari hrast, Mekote, Miševići, Put farmi, Put za lovačku kuću, Studenac, Stolića do, Gaj, Balića brijeg, Orah, Bukovik, Mostarska, Krčevina, Srebrenička, Ulica grabova, Duboki potok, Bosanska, Podrinjska, Dolina, Donji Zovik, Gornji Zovik, Slatina, Ljubovići, Vratić, Prijeki put, Kahrimani I, Kahrimani, Bjelašnička, Omladinska, Željeznička, Radnička, Šavnička, 9. maj, Novo naselje, Donji Doljani, Doljani, Osenik, Milakovac, Rezidencijalno naselje, Kapuča, Mlavica, Suhodolska, Luke, Lučko polje, Sivice, Stara pruga Sivice, Bosanskih gazija, Tarčin, IX brdske brigade, Tuheljska, Vilovačka, 27. juli, Gornja Bioča, Gornja Bioča I, Budmolići, Budmolići I, Budmolići II, Budmolići III, Civilnih žrtava rata, Smucka i Opute.



## Općina Hadžići i ove godine kupila ruksake i školski pribor za sve prvačice

**N**ova školska 2017./2018. godina u odgojno-obrazovnim ustanovama na području Kantona Sarajevo počela je u ponedjeljak 4. septembra. Na području općine Hadžići u četiri osnovne i jednoj srednjoj školi nastavu je pohađalo blizu 2900 učenika. U Osnovnu školu "6. mart" Hadžići upisano je 75 prvačića dok je njih 47 upisano u Osnovnu školu "9. maj" Pazarić. U Osnovnu školu "Hilmi ef.

Šarić" Tarčin upisano je 69 novih učenika, a u Osnovnu školu "Hadžići" Hadžići njih 71. U Srednjoškolski centar Hadžići u prve razrede je upisano 210 učenika. Općinski načelnik Hamdo Ejubović je za sve prvačice obezbijedio školske ruksake i pribor koji su podijeljeni na svečanostima povodom početka nove školske godine.



## Održana prezentacija o načinu plasmana bh.proizvoda na tržište Turske

**U**organizaciji Općine Hadžići i Fondacije za razvoj ekonomskih, kulturoloških i naučnih odnosa između Bosne i Hercegovine i Republike Turske BIGMEV 1. novembra u sali Općinskog vijeća Hadžići upriličena je prezentacija o načinu plasmana bh. proizvoda na tržištu Republike Turske i ostvarivanje poslovne saradnje privrednika ovih dvaju zemalja. Prezentaciju je otvorio načelnik Općine Hadžići, Hamdo Ejubović. Direktor BIGMEV u BiH Samir Vildić

je naveo da su ciljevi ove fondacije, prije svega, povećanje investicija iz Turske u BiH, povećanje izvoza iz BiH u Tursku, formiranje strateške saradnje po principu reciprociteta, pokretanje održive saradnje između privrednika dviju zemalja, razvoj projekata koji će omogućiti uključivanje bh. dijasporu te doprinosi razvoju BiH. Direktor je kao usluge BIGMEV-a naveo organizacije evenata, sajmova, obilazak fabrika i terena.







## Komandant Turskog bataljona posjetio Općinu Hadžići

Komandant Turskog bataljona u BiH brigadir Tayfun Çelik, boravio je 16. januara u posjeti Općini Hadžići te se tom prilikom sastao sa načelnikom Hamdom Ejubovićem. Sastanku su prisustvovali i predstavnici Udruženja „9.bbr“ Hadžići, a razgovarano je o mogućnostima unaprjeđenja saradnje EUFOR-a sa lokalnom zajednicom. Saradnja dvije zemlje, Turske i Bosne i Hercegovine je u stalnom porastu, kako na planu privrede tako i kulture. Općina Hadžići ima bratski odnos sa nekoliko turskih općina što je ključ jačanja saradnje između naših država.



## Službena posjeta bratske Općine Hadžilar

U službenoj posjeti Općini Hadžići 23. novembra boravila je delegacija turske Općine Hadžilar predvođena načelnikom Doganom Ekiciom. Delegaciju bratske općine u Sali vijeća dočekali su Općinski načelnik Hamdo Ejubović te predsjedavajući Općinskog vijeća Hadžići Senad Kovačević sa svojim pomoćnicima i saradnicima. Općinsko vijeće Hadžići je na 32. redovnoj sjednici održanoj 30. septembra 2015. godine usvojilo Odluku o bratimljenju Općine Hadžići, Bosna i Hercegovina sa Općinom Hacilar (Hadžilar), Republika Turska. Nakon protokolarnog dijela potpisivanja Odluke o bratimljenju dva načelnika i njihovi saradnici održali su niz sastanaka na kojima je razgovarano o mogućnostima unaprjeđenja privredne i kulturne saradnje.





## Načelnik Ejubović ugostio predstavnike "Crnih labudova"

Predstavnici Udruženja boraca „Crni labudovi“ na čelu sa predsjednikom Avdom Subašićem, Zejdom Dukmenićem i Kenanom Mušibegovićem posjetili su 17. oktobra Općinu Hadžiću i Općinskog načelnika Hamdu Ejubovića. Prilikom posjete razgovarano je o pomoći u gradnji budućeg centralnog spomen-obilježja za sve poginule borce ove jedinice, koje se gradi u sarajevskom naselju Nedžarići. U okviru centralnog spomen-obilježja gradi se i Muzej-soba "Crnih labudova", u kojoj će biti



predstavljen cjelokupan ratni put ove jedinice, što je dio njegovanja kulture sjećanja na odbrambeno-oslobodilački rat i saborce koji su dali živote za Bosnu i Hercegovinu.

## Predstavnici "Patriotske lige" općine Hadžići kod načelnika Ejubovića



Na zahtjev Upravnog odbora Udruženja boraca "Patriotska liga" općine Hadžići 19. januara je u zgradi Općine održan sastanak predstavnika ovog Udruženja sa Općinskim

načelnikom Hamdom Ejubovićem. Sastanak je iniciran zbog sigurnosne situacije u zemlji te mogućim implikacijama na našu lokalnu zajednicu. Istaknuta je potreba da se razmotri situacija, izvrši analiza, razmjene informacije kao i da se uspostavi komunikacija između svih društvenih faktora na području općine Hadžići. Poruka sa sastanka jeste da se Bosna već jednom suprotstavila agresiji te da još uvijek postoje ljudi koji su spremni da se suprotstave eventualnim novim napadima na državu BiH.

## Visoka delegacija Islamic Relief Worldwide posjetila Općinu Hadžići

Visoka delegacija Organizacije Islamic Relief-a Worldwide boravila je 21. jula u posjeti Općini Hadžići. Njih je primio Općinski načelnik Hamdo Ejubović. Pored bosanskohercegovačkog ogranka Islamic Reliefa, gosti su nam bili prof. Dr. Azni Idris te Zainal Abidin vodeći ljudi Islamic Relief-a Malezije. Na sastanku je razgovarano o nastavku saradnje naše Općine sa ovom organizacijom koja je već realizovala niz projekata na našoj općini. Podsjećamo, samo prošle godine donirali su porodicama bez stalnog zaposlenja i lošeg imovinskog stanja platenike veličine 500 metara kvadratnih. Islamic Relief Worldwide



je član Ekonomskog i socijalnog vijeća UN-a, potpisnica je "Code of Conduct", Međunarodnog Crvenog križa i Crvenog polumjeseca kao i drugim nevladinim organizacijama u borbi protiv siromaštva, katastrofa, i socijalne nepravde.





## Načelnik Ejubović posjetio ranč za konje “Lazy Horse”

Općinski načelnik Hamdo Ejubović sa svojim pomoćnicima i saradnicima posjetio je 19. oktobra ranč za konje “Lazy Horse” Hadžići, smješten na površini od oko šest hektara u Aleksićima. Načelnika je dočekaao direktor Rasim Jusufović sa svojim timom te gostima pokazao sadržaje koje nudi ovaj ranč. Konjički centar “Lazy Horse” Hadžići je biser naše turističke ponude smješten u podnožju Ormanja sa otvorenim pogledom na vrhove Bjelašnice. Staze za jahanje koje ga okružuju protežu se na stotine kilometara netaknute prirode. Tu su i ispusti za konje, veliki kvadratni pješčani manjež za jahanje, mali okrugli

manjež za lonžiranje i trening konja, 800 metara duga staza za galop, kasanje i ski-joering, štala sa pratećim sadržajima. Dobrodošli su iskusni jahači, početnici i naravno nejahači. Ranč nudi individualne i grupne časove jahanja u manježu, kao i jahanje u prirodi. Dok čekate članove svoje porodice ili prijatelje, na raspolaganju vam je klubska prostorija za odmor sa internet kutkom i mnoštvom knjiga o konjima.

Ono što je nedostajalo ranču jeste kvalitetan pristupni put. Prilikom posjete dogovoreno je da se izvrši rekonstrukcija i asfaltiranje puta od mesdžida u Lukama do ranča u Aleksićima.



## Poklon knjiga za peticu

Skoro pet stotina dječaka i djevojčica, koji postižu odlične i primjerne rezultate u osnovnim školama na području naše općine na kraju ove školske godine dobit će knjigu na poklon. Zahvalnost ide na adresu Općine Hadžići i Općinskog načelnika Hamde Ejubovića koji ovu tradiciju baštini već četvrtu godinu zaredom. “Nije mala stvar biti najbolji i prvi u konkurenciji svojih prijatelja i to je zaista nešto što treba da vas opredijeli za dalje korake u životu, da se stalno borite i pokušavate da budete najbolji. Stoljeće u kome živimo je stoljeće znanja i male zemlje, kao što je Bosna, mogu da ostvare napredak samo ukoliko budemo više ulagali u znanje, ukoliko budemo pametniji i bolji od drugih”, poručio je načelnik Ejubović.

Nastavnička vijeća osnovnih škola i Načelnik Općine Hadžići ove godine su se odlučili za dva naslova “Let tuđim krilima” i “Kaldrma”. To su nagrađivane knjige najboljih priča za djecu i omladinu bosanskohercegovačkih autora.





## Općinsko takmičenje iz predmeta Demokratija-Civitas

Takmičenje je održano u subotu 01.04. u OŠ "6.mart" u Hadžićima. Učestvovala su ekipe osnovnih škola sa područja naše Općine i Općine Trnovo od po osam učenika koji su predstavili svoje radove, a takmičenjem je rukovodio organizacioni tim, odnosno stručna komisija imenovana od strane PPZ-a i CIVITAS-a koji je i organizator ovog takmičenja. Nakon pregleda panoa od strane stručnog žirija i prezentacije učenika žiri je sumirao rezultate, te proglasio pobjednike. Prvo mjesto je zauzela ekipa OŠ "Hadžići" Hadžići sa temom "Problem uređenja školskog dvorišta" (686 bodova) koja će učestvovati na Kantonalnom takmičenju. Drugo mjesto je osvojila OŠ "Zaim Kolar" Trnovo sa temom "Važnost poznavanja prve pomoći" (658 b), treće mjesto je pripalo OŠ "6. mart" Hadžići sa temom "Nedostatak lifta u školi" (652 b), četvrto mjesto je osvojila OŠ "9.maj" Pazarić sa temom "Nasilje nije moj izbor" (622 b), dok je peto mjesto pripalo OŠ "Hilmi ef. Šarić" iz Tarčina sa temom "Nedostatak kukturnih i sportskih dešavanja na području Tarčina" (553 boda). Za sve učesnike su obezbjeđeni sokovi i sendviči od strane domaćina, odnosno Općine, a nagrade i diplome ekipama je obezbjedila nevladina organizacija CIVITAS.

## Općinsko takmičenje iz matematike

Općinsko takmičenje iz matematike održano je 09.03.2017. godine u OŠ „Hilmi ef. Šarić“ Tarčin. Takmičenje je bilo pojedinačno, a takmičili su se učenici VII, VIII i IX razreda devetogodišnjeg obrazovanja, po tri učenika iz svakog razreda škola učesnica. OŠ "Zaim Kolar" iz Trnova je imala svoje predstavnike za VII i VIII razred. Što se tiče ukupnog plasmana po osvojenim bodovima za sva tri razreda (VII, VIII i IX) prvo mjesto je zauzela OŠ "6.mart" Hadžići (119 b), druga OŠ "9.maj" iz Pazarića (115,5 b), treća je bila OŠ "Hadžići" (103 b), četvrta OŠ "Hilmi ef. Šarić" Tarčin (100 b), a peta bez devetog razreda je bila OŠ "Zaim

Kolar" Trnovo-Dejčići sa osvojenih 18 bodova. Za sve učesnike u takmičenju obezbjeđeni su sokovi, sendviči i voće.

## Općinsko takmičenje iz geografije

Općinsko takmičenje iz geografije održano je 22. marta u OŠ "6.mart" u Hadžićima. Takmičenje je bilo pojedinačno a osnovne škole su predstavljali po tri učenika IX-ih razreda iz svake škole (ukupno 15 učenika). Učenici su od ukupno 1500 osvojili 1.082 boda (72,13%). Najbolje rezultate u ukupnom zbiru bodova ostvarila je OŠ "6.mart" Hadžići čiji su učenici osvojili drugo i treće mjesto, i to: II mjesto Šehić Almedin (87,5+18 bod.), III mjesto Bašić Amina (87 bod.), a I mjesto je osvojio Šahić Muhamed (87,5+19 bodova) učenik OŠ "Hilmi ef. Šarić" iz Tarčina. Ukupni plasman škola po ukupnom broju osvojenih bodova bio je OŠ "6.mart" Hadžići sa 250 bodova, OŠ "Hilmi ef. Šarić" Tarčin sa 245,5, OŠ "Hadžići" Hadžići sa 231,5, OŠ "9. maj" Pazarić 213,5 i OŠ "Zaim Kolar" Trnovo 141,5 bodova.

## Općinsko takmičenje iz informatike

Općinsko takmičenje iz informatike održano je 23. marta u OŠ "Hadžići" u Hadžićima. Po propozicijama na ovom takmičenju su se takmičili učenici koji su činili ekipu od tri učenika za svaku školu i kao ekipa su rješavali zadatke iz testa za informatiku (ekipno). Učenici su pokazali dobro znanje iz ove oblasti i od mogućih 500 bodova osvojili 383 boda (76,6%). Prvo mjesto je zauzela ekipa OŠ "Hilmi ef. Šarić" iz Tarčina sa osvojenih maksimalnih 100 bodova i završenim radom u 10,15 sati, koliko je osvojila i OŠ "Hadžići" Hadžići ali nešto kasnijim završetkom (10,20 sati), što je regulisano propozicijama ovog takmičenja. Na kraju su proglašeni rezultati: OŠ "Hilmi ef. Šarić" Tarčin (100 bodova), OŠ "Hadžići" Hadžići (100), OŠ "9.maj" Pazarić (86), OŠ "6.mart" Hadžići (84) i OŠ "Zaim Kolar" Trnovo-Dejčići (13).



## Multimedijala sala Hadžići: Predstava "Srebrena krv"

Predstava "Srebrena krv" koja govori o životu dvojice braće, zatečenih u Srebrenici u vrijeme genocida, i njihovim razmišljanjima, kako i na koji način se izvući na slobodnu teritoriju, odigrana je 08.07.2017. godine u multimedijalnoj sali Hadžići kao doprinos naše lokalne zajednice obilježavanju Dana žalosti. Ulaz je bio slobodan. Za sve koji su došli pogledati predstavu Općina Hadžići je spremila skromni poklon u vidu "Cvijeta Srebrenice", u znak sjećnja na 11. juli 1995. godine.

"Na sceni nemamo niti jednu predstavu koja govori o Srebrenici, što je po mome mišljenju sramota. A još uvijek nemamo ni ozbiljnog



filma, koji je svjetskih razmjera, a koji govori o genocidu", kazao je Samir Karić, glumac u predstavi "Srebrena krv".

## Promocija knjige "Hadžićka toponimija"

U prepunoj hadžićkoj multimedijalnoj sali 3.marta promovisana je knjiga „Hadžićka toponimija“ autora Vahida Alađuza. Organizator promocije bila je Općina Hadžići, a promotori Općinski načelnik Hamdo Ejubović, mr. Edin Bujak, doc.dr. Adnan Kaljanac, mr. Mehmed Kardaš i mr. Enes Kazazović. Promociji su prisustvovali brojni gosti iz kulturnog, političkog i javnog života općine Hadžići. "Hadžićka toponimija" obrađuje veoma širok spektar toponima, oronima, ojkonima i hidronima na području Hadžića. Ovo djelo je na bosanskohercegovačkom prostoru otvorilo novi

pristup istraživanju prošlosti pojedinih predjela, te pružilo detaljan uvid u pojedinačne toponime i njihovu potencijalnu historijsku pozadinu. Nakon promocije, svi posjetioци su dobili na poklon primjerak „Hadžićke toponimije“.







# DAN OPĆINE

DAN OPĆINE HADŽIĆI DAN OPĆINE HADŽIĆI DAN OPĆINE HADŽIĆI DAN OPĆINE



Svečanom sjednicom Općinskog vijeća Hadžići 6. marta u Multimedijalnoj sali Hadžići obilježen je 1. mart – Dan nezavisnosti BiH i 6. mart – Dan općine Hadžići. Na ovoj svečanosti su dodijeljena općinska i sportska priznanja za 2016. godinu. Kolektivna „Šestomartovska plaketa“ dodijeljena je KUD „Bjelašnica“ Pazarić, a pojedinačne Munibu Bečiroviću i Refiku Reizbegoviću. Kolektivna „Zahvalnica Općine Hadžići“ dodijeljena je preduzeću „MUSIC – COMPANY“ d.o.o. Hadžići, Udruženju

za traženje zarobljenih i nestalih iz Hadžića, Rukometnom klubu Hadžići, a pojedinačne Dževadu Musiću, Senadu Sulejmanoviću te posthumno Fikretu Joldi. Posebno počasno priznanje „Priatelj Hadžića“ dobio je direktor kompanije „Hoše Komerc“ Izet Bozaliija. U sklopu obilježavanja ovih bitnih datuma, odata je počast herojima odbrambeno-oslobodilačkog rata 92-95, te položeno cvijeće i proučena Fatiha na šehidskim mezarjima na Igmanu, Mokrinama, Kahrimanima i Centralnom spomen-obilježju







# NE HADŽIĆI

INE HADŽIĆI DAN OPĆINE HADŽIĆI DAN OPĆINE HADŽIĆI DAN OPĆINE HADŽIĆI



ispred zgrade Općine. Ovogodišnje obilježavanje Dana nezavisnosti i Dana Općine pratili su brojni kulturno-sportski događaji. Izvršena je primopredaja modernog ultrazvučnog aparata vrijednog 48 000 KM Domu zdravlja Hadžići. Održane su priredbe u osnovnim školama „6. mart“ „Hadžići“ i Srednjoškolskom centru Hadžići, te odigrani turniri u malom fudbalu, košarci, šahu, tenisu, sjedećoj odbojci, odbojci i rukometu. Promovirana je knjiga „Hadžićka toponimija“ Vahida Alađuza, te prikazan

dokumentarni film „Sa Igmana pogledat je lijepo“. Voditelj programa na Svečanoj sjednici bila je Amela Hubjer Hatić, a goste je muzičkim izvedbama zabavljao Latif Močević, te učenici Srednjoškolskog centra Hadžići. Nakon svečane sjednice, gosti su imali priliku prisustvovati izložbi ruketvorina Udruženja za afirmaciju kulture i umjetnosti „Ars populi“ u Kulturnom centru Hadžići. Članice ovog udruženja su pohađale kurs kuhanja te u saradnji sa Općinom za sve prisutne priremile bogatu i ukusnu trpezu.







# HADŽIČKO LJETO 2017: REKORDAN BROJ POSJETITELJA



Dvanaesta po redu kulturno-zabavna manifestacija „Hadžićko ljeto“ ostaće upamećena po rekordnom broju posjetitelja. Od 29. jula do 5. augusta programske sadržaje je pratilo preko 20.000 ljudi. Već tradicionalno, zvaničnom otvaranju Hadžićkog ljeta prethodila je izuzetno posjećena izložba rukotvorina i gastro ponuda Udruženja za afirmaciju kulture i umjetnosti „Ars populi“ u hadžićkom parku „Meram Konya“. Na stadionu Osnovne škole „6.mart“ održan je Međunarodni dječiji festival folkloru pod nazivom „Djeca mira“. Hadžićkoj publici igrom, plesom i narodnim nošnjama predstavila su se djeca iz Bugarske, Grčke, Izraela, Turske, Crne Gore, Srbije, Češke Republike te predstavnici BiH. Zabava za mališane bila je upriličena 30. jula na stadionu OŠ „6.mart“ a uveseljavali su ih Latif Močević i „Mravko Travko“. Hadžićka publika imala je priliku upoznati jednog od najzanimljivijih predstavnika bosanskohercegovačke svakodnevice, akademika Abdulaha Sidrana. Predstava „Sunce tuđeg neba“ koja nasmijava cijelu regiju izvedena je pred



1.500 posjetitelja. Glumac, voditelj i showman Dragan Marinković Maca opravdao je očekivanja mnogobrojne publike koja ga je nagradila dugotrajnim aplauzom. Semir Cerić Koke, Emina Tufo i Emrah Emšo pjevali su mnogobrojne hitove na večeri narodne muzike. Održan je koncert „Večer sevdaha“ na kojem su nastupili poznati pjevači sevdalinki. Publiku su uz doajene sevdaha Seju Pitića, Hasibu Agić, Ferida Avdića, Nihadu Kapetanović posebno oduševili mladi pjevači sevdalinki Alma Subašić, Amna Aganović i Edo Jahić, a sve pjevače je pratio ansambl Dragoljuba Đuke Savića. Bila je to uistinu posebna koncertna večer, a niko od publike nije mogao ostati ravnodušan na vrhunske interpretacije lijepih i dirljivih sevdalinki. Čuveni izvođač ilahija i kasida, hafiz Aziz ef. Alili, Armin Muzaferija, Abdusamed Šljivar i ples semazen derviša kreirali su magičnu večer duhovne muzike. U subotu 5. augusta New Wave Hadžići Music Festom okončano je Hadžićko ljeto 2017. Na ovom, sada već prestižnom festivalu, kao specijalni gost nastupila je grupa Divlje jagode.









## MURIS MEŠANOVIĆ poklonio dres načelniku Ejuboviću

Općinski načelnik Hamdo Ejubović ugostio je 14. juna u svom kabinetu najboljeg stranog igrača češke nogometne lige u protekloj sezoni Murisa Mešanovića. Mešanović, dijete FK Radnik, imao je sjajnu sezonu iza sebe u Slaviji iz Praga gdje je postigao 12 golova i drugi je strijelac kluba i drugi strijelac lige. Mešanović je svoj nogometni put počeo u Radniku, a karijeru je nastavio graditi u Jihlavi gdje je prošao njihovu akademiju. Nastupao je i za Jablonec. Njegovi nastupi nisu ostali nezapaženi pa je u januaru 2016. stigao u slavnu prašku Slaviju. Kao znak zahvalnosti i podrške lokalne zajednice u stvaranju uspješne



nogometne karijere, Mešanović je poklonio dres sa brojem 24 načelniku Ejuboviću.

## JOSIP PEJAKOVIĆ sa najnovijom monodramom u Hadžićima



Pod pokroviteljstvom Općine Hadžići u petak, 27.10.2017. godine, u Kulturno sportskom i rekreacionom centru Hadžići odigrana je monodrama "Bh stend-drp tragedy" prvaka drame Narodnog pozorišta u Sarajevu i jednog od najvećih bh. glumaca Josipa Pejakovića. Ulaz je bio besplatan.

## "BICIKL U MOM GRADU" okupio 200 učesnika

U Hadžićima je 30. aprila održana četvrta po redu tradicionalna manifestacija "Bicikl u mom gradu". Ovo je jedna u nizu aktivnosti koje su škole provodile povodom Dana planete Zemlje, a koje su podržale likovna, ekološka i saobraćajna sekcija. Manifestacija je održana u organizaciji osnovnih škola naše općine u saradnji sa PS Hadžići, a pod generalnim pokroviteljstvom Općine Hadžići. Biciklijada i pored problema uzrokovanih vremenskim prilikama je protekla u najboljem redu na zadovoljstvo svih učesnika i Organizacionog odbora. Oko 200 učesnika



različite životne dobi vozilo je bicikl ulicama svoga grada, trasu dugu oko četiri kilometra, koja je trajala 35 minuta.





## Mija Ukropina vicešampion Balkana



U sastavu reprezentacije Bosne i Hercegovine na Balkanskom prvenstvu u Turskoj održanom 11. i 12. novembra 2017. godine nastupila su tri takmičara iz Taekwondo kluba "Iskra" za koji nastupa Hadžićanka Mija Ukropina. Mija je u kategoriji do 73 kg osvojila srebrnu medalju i postala vicešampion Balkana. Do ove titule došla je nakon dobijene dvije borbe i porazom u finalu. Nastupilo je preko 600 takmičara iz osam nacionalnih selekcija Bugarske, Rumunije, Srbije, Makedonije, Crne Gore, Albanije, Turske, Kosova i BiH. Općina Hadžići je finansijski podržala nastupe Mije Ukropine i Amine Hasić.

## Okončan prvi malonogometni turnir "Sportom protiv poroka"

Udruženje fudbalera rekreativaca Hadžići uspješno je organizovalo malonogometni turnir pod nazivom "Sportom protiv poroka" koji se održao 20. i 21. maja na sportskom igralištu u Binježevu. Ovo Udruženje, čiji se članovi kroz razne vidove takmičenja, bave rekreativnim sportom, ima za cilj, da svojim djelovanjem, doprinosi razvoju, afirmaciji i promociji rekreativnog sporta na našoj općini i povećanju bavljenja rekreativnim sportom.



## Alma Hrnjić osvojila zlato na državnom prvenstvu



Na atletskom prvenstvu BiH za seniore u Atletici održanom u Zenici, hadžićanka Alma Hrnjić osvojila je prvo mjesto u utrci na 3.000 metara sa vremenom 10:39. Inače, Alma nastupa za Atletski klub Novi Grad Sarajevo, a u protekloj godini ponijela je titulu najperspektivnije sportistkinje Općine Hadžići.

## Hadžići dobili Balkansku prvakinju u Taekwondo-u

Devetnaesto Balkansko prvenstvo u Taekwondo-u završeno je 12.11.2017. godine u Turskoj na kome je učestvovala i naša reprezentacija u kojoj su nastupila četiri člana Taekwondo kluba "Centar" Hadžići. Nastupali su: Amin Murić, Helena Kesić, Lamija Durmić i Amar Hujić. Dvoje su se okitili medaljama. Amar Hujić u kategoriji seniora do 58 kilograma je ostvario plasman 3. mjesto, dok je prvakinja Balkana u kategoriji seniorki do 67 kilograma Lamija Durmić. Čestitamo našim sportistima.





## HADŽIĆI FRIENDS CHAMPIONSHIP



Završen je i 7. taekwondo turnir pod nazivom "Hadžići friends championship" na kojem je nastupilo 390 takmičara, predstavnika 34 kluba iz tri države. Takmičenje je otvorio predsjedavajući Općinskog vijeća Hadžići Senad Kovačević.



### Rezultati:

Ukupni poredak "Hadžići friends championship":

1. Novi Grad Sarajevo
2. Centar Hadžići
3. Nur Kakanj

Poredak po skupinama: Vrtićanci/Vrtićanke:

1. Start
2. Centar Hadžići
3. Željezničar

Mlađi kadeti/Mlađe kadetkinje:

1. Novi Grad Sarajevo
2. Sarajevo
3. Akademija Jale

Kadeti/Kadetkinje:

1. Novi Grad Sarajevo
2. Olympic
3. Tim Bosna

Juniori/Juniorke:

1. Novi Grad Sarajevo
2. Nur
3. Derventa

Seniori/Seniorke:

1. Centar Hadžići
2. Novi Grad Sarajevo
3. Frenki



## „Dani otvorene zabavne škole nogometa“

Osamu godinu zaredom u sklopu aktivnosti koje provodi Općina Hadžići u saradnji sa organizacijom CCPA (Cross Cultures Project Association) i trenerskom grupom općine Hadžići realizovana je sportska manifestacija „Dani otvorene zabavne škole nogometa“. Oko 150 učenika sa područja općine Hadžići zajedno sa svojim trenerima prodefilovalo je kroz Hadžiće a nakon toga druženje i igru su nastavili na stadionu FK "Radnik". U radu sa najmlađim angažovano je 15 trenera koji su educirani na seminarima organizovanim od strane međunarodne organizacije "CCPA-OFFS" i u saradnji sa predstavnicima u Sarajevu. Ovaj projekat primarno promovise zadovoljstvo koje



proizilazi iz nogometne igre, a ima za cilj prevenciju konflikata i kriminala. Pomoć projektu su pružili FK "Radnik", te škola fudbala Tarčin, a generalni pokrovitelj i finansijer je Općina Hadžići.





# BOGATA TRADICIJA ŽENSKOG RUKOMETA



Rukomet u Hadžićima ima veoma zapaženu historiju, pogotovo ženski rukomet koji je ujedno i najtrofejniji sport općine Hadžići. Kroz historiju ženski rukomet u Hadžićima najprije egzistira u okviru sportske porodice Partizan, potom kao ŽRK Ingrap, zatim ŽRK Željezničar-Ingrap pa ŽRK Željezničar, a danas kao RK Hadžići-DIDO GROUP. Hadžićka rukometna priča, bogata velikim uspjesima, formalno je počela 1966. godine.

**U period od 1966. do 2009.**

**hadžićke rukometašice osvajaju:**

**Dva puta prvenstvo BiH**

**Tri puta viceprvakinje BiH**

**Četiri puta Kup BiH,**

**Jedanaest puta učestvuju u Evropskim takmičenjima**

Nakon izostanka iz najelitnijeg državnog takmičenja, ženski rukomet u Hadžićima posljednjih godina doživljava svojevrsnu reanimaciju. Sa radom počinje dobro prepoznatljiva škola rukometa na tri lokaliteta, u Tarčinu, Pazariću i Hadžićima te broji oko

**Za naš grad, za naš klub  
RK Hadžići-Dido group**

80 djevojčica. Za to vrijeme, seniorska ekipa nastavlja učešće u Prvoj ligi BiH koja okuplja timove iz Federacije BiH i na kraju sezone 2016/17. zauzima prvo mjesto i time ostvaruje primarni cilj kluba, povratak u Premijer ligu BiH. Također s ponosom ističemo da su naše mlađe kadetkinje u sezoni 2016/17 osvojile Međukantonalnu ligu čime su izborile plasman na Državno prvenstvo te u završnici osvojile 3. mjesto na listi najboljih u BiH. U sezoni 2017/18. naše seniorke vraćaju se na parkete Premier lige BiH gdje ponosno promovisu ime našeg grada. Na kraju jesenje polusezone naš klub zauzima solidno 8. mjesto sa pretpostavkom da u već u narednoj sezoni ostvarimo veće rezultatske ambicije. Istovremeno sa jačanjem seniorske selekcije posebno želimo istaći činjenicu da je naš klub u takmičarsku sezonu po prvi put ušao sa 3 takmičarske selekcije, cicibanke, mlađe kadetkinje i kadetkinje te je pokrenuo rad sa djecom uzrasta 7-11 godina kroz tzv. minirukomet. Vizija kluba je da u narednom četverogodišnjem ciklusu vratimo sjaj školi rukometa kao jednom prepoznatljivom brendu u BiH u ženskoj konkurenciji te da stvorimo stabilnog premierligaša koji će se u najvećoj mjeri oslanjati na igrače iz vlastitog omladinskog pogona. Slogan simbolično nazvan POHOD NA STARE STAZE SLAVE postao je glavni moto i pokretačka snaga svih aktera naše sportske priče, sponzora, igrača, trenera, navijača, roditelja, članova upravljačkih struktura i svih naših sugrađana u nadi da ćemo u periodu koji je pred nama postići još bolje rezultate i afirmisati što veći broj mladih rukometašica.



Plasman	Tim	M	Z	N	G	U	Usp	Por	Usp	Por	Usp	Por	Usp	Por	Usp	Por
1	RK Dido	11	11	0	0	0	336	220	105	33	0	0	0	0	0	0
2	ŽRK Ingrap Zvezdici	11	8	1	2	323	261	72	25	0	0	0	0	0	0	0
3	ŽRK Ingrap Zvezdici	11	8	1	2	326	260	36	25	0	0	0	0	0	0	0
4	ŽRK Stolica Hrasnica Stolica	11	6	0	5	223	212	16	24	0	0	0	0	0	0	0
5	ŽRK Gradina Hrasno Mlad	11	5	0	6	215	202	13	21	0	0	0	0	0	0	0
6	ŽRK Ingrap CD Lukavci	11	6	0	5	287	287	0	18	0	0	0	0	0	0	0
7	ŽRK Ingrap	11	6	0	5	248	281	-15	15	0	0	0	0	0	0	0
8	RK Hadžići Dido Group	11	4	0	7	310	351	-41	12	0	0	0	0	0	0	0
9	ŽRK Hadži	11	3	0	8	276	378	-102	8	0	0	0	0	0	0	0
10	HRK Katarina Hrasno	11	2	0	9	282	370	-88	8	0	0	0	0	0	0	0
11	ŽRK Ingrap	11	1	0	10	280	356	-76	4	0	0	0	0	0	0	0
12	RK Hrasno javna	11	1	0	10	243	330	-87	4	0	0	0	0	0	0	0



## Promovisan roman Rahmane Kolende



U multimedijalnoj sali u Hadžićima 27. februara promovisana je knjiga „Moj put do hidžaba“ autorice Rahmane Kolende. Ovo je Rahmanin prvi roman, autobiografski, koji govori o njenom životu od školskih dana sa stvarnim likovima, istinitim i autentičnim događajima. Promotori knjige bili su Nermin Brajanović,

Ekrem Kahrman, Hava Sakić, Amar Bešlija i Lejla Mehdi-Ismailovski.

- Moj uspjeh je uspjeh svih vas. Ovaj roman posvećen je mom dedi i nani, u znak zahvalnosti. U romanu su našli mjesto svi koje neizmjereno volim, moji nastavnici, profesori i prijatelji. Koristim ovu priliku da se zahvalim sponzorima Općini Hadžići na čelu sa načelnikom Hamdom Ejubovićem. Oni su do sad bili sponzori moje tri knjige. Što se tiče romana, njega sam napisala za jednu noć. Htjela sam da sve bude jednostavno i razumljivo čitaocima, kazala je, između ostalog, autorica na promociji.

Rahmana Kolenda iza sebe ima još četiri zbirke poezije “Šareni mali svijet”, “Sreća se osmijehom piše”, “Ili hoćeš ili nećeš”, “Ljubav i snovi”. Dobitnica je brojnih domaćih i međunarodnih nagrada iz oblasti književnosti i poezije.

## MARKALE: Sjećanje na **68 ubijenih sugrađana**



Polaganjem cvijeća, učenjem Fatihe i minutom šutnje građani Sarajeva i brojne delegacije odale su počast za 68 Sarajlija koje su izgubile život u masakru počinjenom 5. februara 1994. godine na pijaci Markale. Prvi od dva masakra na pijaci Markale, u samom centru Sarajeva,

dogodio se 5. februara 1994. godine oko podne, kada je minobacački projektil kalibra 120 milimetara ispaljen sa položaja Vojske Republike Srpske na području sela Mrkovići pao na prepunu gradsku pijacu. Tog subotnjeg podneva, 5. februara 1994. godine, na Markalama je poginulo 68 Sarajlija dok je 144 teže ili lakše ranjeno. U organizaciji Kantona Sarajevo održana je zajednička komemorativna sjednica Skupštine Kantona Sarajevo, Gradskog vijeća Sarajeva i općinskih vijeća sa područja Kantona Sarajevo. Nakon zajedničke komemorativne sjednice, svi učesnici su položili cvijeće na spomen-obilježju na pijaci Markale. Ispred Općine Hadžići cvijeće su položili Općinski načelnik Hamdo Ejubović, predsjedavajući Općinskog vijeća Adnan Proha, poslanik u Skupštini KS Eldar Čomor, vijećnici Zehro Marić, Mušanović Mirza i Mirsad Tufo.





## Tradicionalni prijem za borce i privrednike

U multimedijalnoj sali u Hadžićima sredinom januara organizovano je tradicionalno druženje Općinskog načelnika Hamde Ejubovića sa privrednicima i boračkom populacijom. Prijemu su prisustvovali još i predstavnici

mjesnih zajednica, javnih institucija i vjerskih zajednica. Tradicionalno druženje sa Općinskim načelnikom bila je prilika da se u ugodnoj i opuštenoj atmosferi porazgovara i razmjene međusobna iskustva.



## Kahrimani: Obilježen Dan Armije RBiH



Polaganjem cvijeća i učenjem Fatihe na šehidskom mezarju Kahrimani 14. aprila obilježen je Dan Armije RBiH. Cvijeće su položile delegacije Općine Hadžići i Koordinacija boračkih udruženja općine Hadžići. Armija

Republike Bosne i Hercegovine bila je zvanična oružana snaga Republike Bosne i Hercegovine (međunarodno priznate i suverene zemlje) za vrijeme agresije na RBiH. Osnovana je 15. aprila 1992. godine, a taj datum se obilježava kao Dan Armije RBiH. Armija je formirana od jedinica Teritorijalne odbrane BiH, i organiziranih dobrovoljaca. Vrhovni zapovjednik bio je predsjednik Republike, a nakon Dejtonskog sporazuma, ARBiH je zajedno sa HVO-om formirala Vojsku Federacije BiH, da bi nakon reforme odbrane bila transformisana u "Bosanske rendžere", jednu od tri pukovije u okviru Oružanih snaga BiH.



## Odana počast šehidima, poginulim i umrlim pripadnicima MUP-a



Dan policije Kantona Sarajevo tradicionalno se svake godine obilježava 6. aprila. Tim povodom Općina Hadžići i Udruženje “Veterani policije SJB Hadžići” organizovali su niz događaja kojima je odana počast šehidima, poginulim i umrlim pripadnicima MUP-a. Na Centralno spomen-obilježje Hadžići položeno je cvijeće, a poginulim proučena Fatiha. Cvijeće je položeno i u zgradi MUP-a u Hadžićima gdje je organizovano druženje sa porodicama, saborcima i prijateljima poginulih policajaca. U svim džamijama na području općine Hadžići proučen je Jasin.



“U septembru 1991. godine pripadnici policije i rezervnog sastava su obukli vojne čizme i nisu ih skidali do kraja rata. Do završetka agresije na BiH. Na tom dugom ratnom putu, na gotovo svim ratištima u BiH, naši sinovi su ostavljali svoje živote. Kako smo prvi stali u odbranu BiH tako smo i zadnji platili ogroman ceh. Posljednjeg dana rata, na Godinjskim brdima poginulo je osam naših policajaca”, kazao je Nihad Šehić predsjednik Udruženja “Veterani policije SJB Hadžići”.

## Obilježena 24. godišnjica BITKE ZA KOŠČAN



Oblačno vrijeme s kišom i snijegom nije spriječilo nekoliko stotina građana da 29. aprila obilježe 24. godišnjicu bitke za Koščan. Na spomen-obilježju herojima Armije RBiH i pripadnicima Devete brdske brigade cvijeće su položile i Fatihu proučile brojne delegacije. Dužnu počast našim gazijama odali su: Delegacija Općine Hadžići na čelu sa načelnikom Hamdom Ejubovićem i predsjedavajućim Općinskog vijeća Hadžići Senadom Kovačevićem, Ministarstvo za boračka pitanja KS, delegacija

Općine Ilidža, Udruženje “9.bbr” Hadžići, Udruženje “Patriotska liga” Hadžići, Udruženje “Grom u njedrima Igmana” Hadžići, Udruženje boraca “Veterani rata 92-95”, Udruženje “RVI” Kiseljak, Udruženje “RVI” Hadžići, Udruženje “Maloljetni borci ARBiH” Hadžići, Udruženje “Koščan-Rakovica”, Udruženje “Branilaca BiH” Kiseljak, Udruženje “Antifašista i boraca NOR-a” Ilidža, Udruženje “Antifašista i boraca NOR-a” Hadžići, MZ Rakovica, Općinski odbor SDA Hadžići, Asocijacija mladih SDA Hadžići, Općinska organizacija SDA Kiseljak te Stranka Demokratske fronte Hadžići. Brdo Koščan bilo je jedno od najvažnijih strateških tački odbrane Sarajeva u toku agresije na BiH u periodu 1992.-1995. Borci Koščanskih bitaka dobili su čak 11 Zlatnih ljiljana, najveće vojničko priznanje.





# DAN ZLATNIH LJILJANA

Udruženje “Dobitnika najvećih ratnih priznanja” općine Hadžići i Općina Hadžići na dostojanstven način su 5.5.2017. godine obilježili “Dan zlatnih ljiljana”. U holu Osnovne škole “Hadžići” Hadžići upriličeno je svečano otkrivanje panoa dobitnika najvećih ratnih priznanja. Priznanje Zlatni ljiljan je najveće odlikovanje Armije Republike Bosne i Hercegovine, a 9. maj u BiH obilježava se kao Dan Zlatnih ljiljana. Ovakvo priznanje su zaslužili ljudi koji su pokazali svoje najhrabrije podvige u ratu. Prva ratna priznanja Zlatni

ljiljan počela su se dodjeljivati već u junu/ julu 1992. godine u skladu s Pravilnicima o priznanjima i stimulativnim mjerama.



## Obilježena 25. godišnjica „Bitke na Prehulji“

U subotu, 13. maja, obilježena je 25. godišnjica „Bitke na Prehulji“. Obilježavanju su prisustvovalе porodice šehida, poginulih boraca, ratni vojni invalidi, borci-veterani rata, te mnogobrojni sugrađani. Tradicionalno obilježavanje je započelo polaganjem cvijeća i učenjem Fatihe na spomen obilježju kod JU OŠ “ Hilmi ef Šarić“ u Tarčinu. Zatim je odata počast i položeno cvijeće na mezar pukovnika ARBiH Tufo Refika. U sklopu obilježavanja

ovog datuma održan je čas historije, te položeno cvijeće na spomeniku „Prehulja“. U 13:30 sati otvoren je program manifestacije u MZ Trzanj. Svojim izvedbama kulturno-umjetnički program su upotpunili članovi hora KUD „Bjelašnica“ iz Pazarića, a kada je završen oficijelni dio manifestacije druženje je nastavljeno uz zakusku. Manifestacija je imala za cilj sjećanje na šehide, poginule borce, te ratne vojne invalide Općine Hadžići.







# OBIJEŽENA 25. GODIŠNJICA ZAUZIMANJA KASARNE KRUPA I ZLOČINA U HADŽIĆIMA



Udruženje boraca „Patriotska liga Hadžići i Općina Hadžići bili su organizatori 25. godišnjice zauzimanja kasarne Krupanjska rijeka u Zoviku te zločina počinjenog nad patriotama i borcima u ulici 12. hercegovačke brigade u Hadžićima. Nizom događaja obilježeni su ovi bitni datumi.

## Obilježena godišnjica zauzimanja kasarne Krupa

Na današnji dan 11. maja 1992. godine, grupa boraca s prostora Pazarića, umjesto na izvršenje zadatka prema Ormanju, samoinicijativno preuzima aktivnosti i kreće put kasarne Krupanjska rijeka, radi njenog zauzimanja, te popravljanja svoje borbene i vatrene moći, izuzimanjem MTS iz kasarne.



– Ovo je prilika da javno kažemo ono o čemu smo ćutali 25 godina. Na današnji dan 1992. godine ovdje je izvojevana prva pobjeda nad armadom JNA. Tuzla se desila pet dana kasnije. Ovu kasarnu su branili i redovni i rezervni sastav agresorske vojske. Iz nje smo mi, patriote, uzeli 700 pušaka i 2000 komada municije i drugi MTS koji će nam pomoći da do kraja rata opstanemo na ovim prostorima. Isto tako neće da nam priznaju da su borci sa ovih prostora i naša brigada bili ključ opstanka grada Sarajeva, a samim tim i BiH. Mi smo bili prvi u svemu. Branili smo put spasa i nikada ga nismo doveli u pitanje. Platili smo ogromnu cijenu za to, kazao je u svom govoru Općinski načelnik Hamdo Ejubović. U borbama 11. maja ginu i prvi šehidi na području općine Hadžići – Hujčić Mehmedalija i Fejzić Nihad.

## Zločin u ulici 12. hercegovačke brigade

Predstavnici lokalne vlasti, udruženja boraca, udruženja logoraša, članovi porodica i brojni građani su učenjem Fatihe i polaganjem cvijeća na spomen-obilježju u ulici Hadželi odali počast civilima i borcima iz ulice 12. hercegovačke brigade. – Hvala svima što ste došli da odate počast žrtvama. Nažalost, mnogih naših komšija







nema među nama. Nema ih samo za to što su bili Bošnjaci. Danas se nama sudi što smo branili svoje kućne pragove. Oni koji su napravili zločin slobodno šetaju. Pozivam sve one koji imaju informacije o grobnicama naših najmilijih da jave, bilo tajno ili javno, kazao je Redžo Ćosić.

Počast je odata KOVAČEVIĆ (SULEJMAN) ADILU, KOVAČEVIĆ (SULEJMAN) UZEIRU, KOVAČEVIĆ(SULEJMAN)DŽENADU,SOLDO (JERKO) MLADENU, KOVAČEVIĆ (ALIJA) EDINU – KAČI, KOVAČEVIĆ (MEHMED) ZIJADU, KOVAČEVIĆ (MEHMED) ZAMIRU, KOVAČEVIĆ (MUJO) AVDI, KOVAČEVIĆ (AVDO) MIRALEMU, KOVAČEVIĆ (AVDO) ALMIRU, MEDIĆ (ANTO) PERI, ISIĆ (HAJRUDIN) ATIFU,HODŽIĆ (REDŽO) ISMETU, ĆOSIĆ (REDŽO) REMZI, ĆOSIĆ (REDŽO) ARMINU.







## Obilježena 25. godišnjica stardanja 715 hadžićkih logoraša



Polaganjem cvijeća na mjestima bivših logora formiranih sredinom maja 1992. godine na okupiranim dijelovima općine Hadžići, kao i prigodnim kulturno-umjetničkim programom, te projekcijom četvrtog dokumentarnog filma Saveza Logoraša u BiH „Djeca iza žice“ u multimedijalnoj sali 11. maja je obilježena 25. godišnjica zločina nad logorašima Općine Hadžići. Kroz hadžićke i druge logore prošlo je ukupno 715 civila. Najmlađi Almir Kardaš imao je samo pet mjeseci, dok je najstariji logoraš bio Mehmed Begović, koji je imao 75 godina. Prvi logor formiran je u Garaži Općine Hadžići. Zatim se formiraju logori Zgrada Socijalnog, Sportska dvorana KSIRC, prostorije TO Hadžići i Podrum Hotelske zgrade. U Hadžićima, Lukavici, Kuli, Svrakama, Foči, Dretelju, Kalinoviku i Zvorniku ubijeno je i umrlo 94 hadžićka logoraša. Tijela 52 logoraša ni nakon 25 godina nisu pronađena. Najveći broj njih, ukupno 46 odvojen je u Lukavici u kasarani „Slaviša Vajner Čiča“ u noći 23/24. juna 1992. godine iz grupe od oko 300 logoraša koji su noć prije dovezeni iz logora KSIRC i Garaže Općine Hadžići. Za zločine počinjene na ovom području po komandnoj odgovornosti osuđeni su Momčilo Krajišnik i Biljana Plavšić, a i neki od izvršilaca Ratko Gašović, Vlastimir Pušara, Boro Krsmanović, Rade Veselinović i Nemanja Jovičić.

## Obilježena 25. godišnjica odbrane Igmana



Porodice šehida i poginulih boraca, preživjeli Igmanski borci, predstavnici boračkih organizacija i Općine Hadžići, polaganjem cvijeća na Spomen obilježju Igman-Brezovača, učenjem Fatihe i minutom šutnje obilježili su u subotu 20. maja 2017. godine 25. godišnjicu odbrane Igmana. U sklopu manifestacije “Stazama igmanskih gazija 92-95“ položeno je cvijeće na šehidskim mezarjima Binježevo, Donji Hadžići, Musići, Žunovnica i Velikom polju. Aprila 1992. godine agresorska JNA zajedno sa pripadnicima paravojnih jedinica SDS-a pokušala je zaposjesti prostor Brezovače na Igmanu čime bi potpuno presjekli komunikaciju glavnog grada BiH sa ostatkom svijeta. Tih dana, 20 ljudi, pripadnika aktivnog i rezervnog sastava SJB Hadžići pod okriljem noći izlaze i zaposjedaju prostor Brezovače. Više srcem nego oružjem odupiru se “Belim orlovima“ i JNA te ih protjeruju sa Igmana. Sve što se dešavalo nakon toga historija će zabilježiti kao najčasniju i najsvjetliju borbu Armije BiH i njenog otpora agresiji na državu BiH. O tome je okupljenim na Brezovači govorio aktivni učesnik svih borbi na Igmanu Nihad Šehić. Organizator ove tradicionalne manifestacije je JOB Hadžići i Općina Hadžići.



## Hadžići: Obilježen Dan nestalih, traga se za 88 osoba

Učenjem Tewhida u Centalnoj džamiji u Hadžićima 25. maja je obilježena 25. godišnjica nestalih Hadžićana. Tewhid su proučili hafiz Hašim Zahirović i efendija Hazim Emšo.

„Od 2000. godine, kada je Udruženje nastalo, tragamo za oko 140 nestalih osoba. Od tada je pronađeno 56 osoba, to je naš veliki uspjeh, ali nažalost još uvijek se traga za 88 odvedenih i ubijenih Hadžićana. To su osobe od 18 do 80 godina.“ - kazala je Ferida Nišić, tehnički sekretar Udruženja za traženje nestalih Općine Hadžići.



## Obilježena 25. godišnjica pogibije pripadnika TO u naselju Gradac



U organizaciji Općine Hadžići i Koordinacionog odbora boračkih udruženja Općine Hadžići obilježena je 25. godišnjica pogibije TO pripadnika u naselju Gradac. U naselju Gradac-Potoci, 24. maja 1992. godine, agresorska granata usmrtila je osam pripadnika ARBiH i pripadnika TO koji su stali u odbranu BiH na liniji Ormanja. Tog kobnog dana zločinački, minobacačkom granatom ispaljenom sa četničkih položaja, su ubijeni: Čomor (Hamdija) Suad, Džafić (Derviš) Nedžad, Džafić (Zajko) Mehmed, Džafić (Mehmed) Ahdin, Kahrmanović (Ismet) Haris, Lihovac (Redžeb) Mevlid, Selimović (Salih) Salem. Elvedina Šehić je poginula nesretnim slučajem, a Šehić-Durmišević (Avdija) Kasim se vodi kao nestao. Prisutni su učenjem Fatihe, Jasina i polaganjem cvijeća na spomen obilježje



Gradac- Potoci odali počast poginulima. Cvijeće su položili delegacije Općine Hadžići, Kordinacija boračkih udruženja, Udruženje porodica šehida i poginulih boraca općine Hadžići, te porodice poginulih i prijatelji. Obilježavanju godišnjice u Gradcu prisustvovali su i učenici Srednjoškolskog centra Hadžići, zajedno sa profesorom historije Rasimom Katanom.







## Dan kada su ginule bosanske gazije **BELI, ISMET, SUDO, SRETO I ADO**

Polaganjem cvijeća, minutom šutnje i učenjem Fatihe na spomen-obilježju borcima Armije i MUP-a RBiH u Sastavcima kod Tarčina, 20. juna je obilježena godišnjica bitke za Postolac-Blinje. Obilježavanju su prisustvovalе porodice šehida i poginulih boraca, ratni drugovi, predstavnici boračkih udruženja i predstavnici Općine Hadžići.

– Bio je to period kada je zategnutost u odnosima s HVO-om došla do usijanja. Ekstremisti HVO-a su 12. juna 1993. godine u selu Tulica zapalili 27 kuća, čiji su vlasnici bili Bošnjaci. Stanovništvo bošnjačke nacionalnosti je protjerano, odnosno pohapšeno i odvedeno u zatvore HVO-a. U borbama vođenim s bojovnicima HVO-a 20. juna 1993. godine poginuli su Zahir Karić Beli, Suad Mehmedić Sudo, Šarić Ismet, Sreten Lojanica Sreto i Adnan Turčinović Ado, prisjetio se tih ratnih dana Ejub Hujić direktni učesnik borbi za Postolac.

Postrojbe HVO-a 16. i 17. juna 1993. godine granatiraju sela u dolini Lepenice: Žežalovo, Bukovicu i Solakoviće, nakon čega su uslijedili pješadijski napadi. U tom periodu borci 9.bbr ARBiH branili su liniju odbrane u dužini 42 kilometra, od Golog brda desno, do Meorišta, lijevo, a da linija razdvajanja s HVO-om nikada nije bila mirna.

- Sa ovog mjesta se sjećamo naših prvaka, ratnih komandanata i gazija. Nikada ih nećemo zaboraviti, kazao je prisutnima predsjedavajući Općinskog vijeća Hadžići, Senad Kovačević. Nakon Sastavaka, prisutni su se zaputili do šehidskog mezarja Kahrmani gdje je proučena Fatiha i položeno cvijeće svim šehidima te na groblje Dub gdje je minutom šutnje, polaganjem cvijeća odata počast Sretenu Lojanici Sreti.





## Obilježena 25. godišnjica stradanja mještana Grivića i Vrančića

**P**olaganjem cvijeća, učenjem Jasina i Fatihe na šehidskom mezarju Grivići i mezarju Vrančići 21. juna obilježena je 25. godišnjica stradanja stanovnika ova dva hadžićka naselja. Na današnji dan tokom agresorskog napada na Griviće i Vrančice živote su izgubili: Hasan Dupovac, Emir Dupovac, Adnan Dupovac, Dinan Dupovac, Fahrudin Čović, Vahid Čović, Meho Čović, Derviš Mujić, Amir Mujić, Midhat Drina i Ejub Drina.

– Današnji datum je najtužniji u historiji Grivića i Vrančića. Na današnji dan 1992. godine u ranim jutarnjim satima, agresor potpomognut mašinerijom JNA u jakom napadu je ovladao ovom kotlinom i zauzeo mjesta Griviće i Vrančice. Stanovništvo je protjerano, a oni koji su branili svoja ognjišta platili su svojim životima. Šest

borca koji su poginuli bili su sinovi jedinci. Od njih šest, trojica su bili posljednji muški potomci određenih familija. Njihovom pogibijom ugasile su se i te porodične loze. Hvala svima koji su danas sa nama ovdje da se dovom sjetimo hrabrih sinova Bosne i svih njenih šeihida, kazao je Mirsad Teleravić.

Cvijeće su položile delegacije Općine Hadžići, boračkih udruženja i građani. Obilježavanje ovog značajnog datuma tradicionalno organizuju Općina Hadžići i boračke organizacije općine Hadžići.





## Obilježena godišnjica stradanja civila u Tarčinu

Prije 24 godine od granate ispaljene sa agresorskih položaja poginulo je sedam, a teže ranjeno dvoje civila. Kobnog 17. jula 1993. godine kod Osnovne škole "Hilmi ef. Šarić" u Tarčinu poginuli su: Adnan Aleta, Almasa Aleta, Omer Horman, Sanela Horman, Mustafa

Nevesinjac, Mujo Svraka i Tanja Šiniković. Delegacije Kantona Sarajevo i Općine Hadžići položile su cvijeće na spomen-ploču na mjestu masakra. Polaganju cvijeća prisustvovali su i članovi porodica poginulih i sugrađani, koji su odali poštu nevino stradalim civilima Tarčina.



## Obilježena 25. godišnjica od pogibije Čedomira Domuza



U prisustvu oko 300 poštovaoca lika i djela Čedomira Domuza, 30. jula je na brdu Brezovača obilježena 25. godišnjica od pogibije ovog heroja. Da heroji ne umiru, dokaz je ovaj veličanstveni skup koji je na novi, inovativan način približio heroje rata 1992 - 1995. svim građanima koji su danas bili na Brezovači.

„Ono što je zapravo specifično i što ste svi sigurno primjetili je činjenica da među nama (organizatorima ovog događaja) nema niti jedan borac, i baš to je glavna razlika našeg udruženja I našeg načina obilježavanja godišnjica, u odnosu na sva druga, gdje su glavni nosioci aktivnosti preživjeli borci, ratni vojni invalidi ili nosioci

najvećih ratnih priznanja. Naš cilj je da mladi ljudi, vaša djeca i unučadi, osmisle i realizuju i budu gorivo za pogon ovog udruženja. A vi, poštovani naši borci, vi ćete biti počasni gosti na našim manifestacijama. Baš vi će te biti oni koji će sjediti ponosno u prvim redovima, vi ćete biti oni koji će nam dati podršku, vi, preživjeli ćete biti neiscrpni materijal od kojeg ćemo sašiti jednu veliku priču, šarenu kao bosanski ćilim, sa svim svojim razlikama, specifičnostima, doživljajima, emocijama, sa svim onim što nam vi možete pružiti i ispričati.” – rekla je Sanja Sadiković. Predsjednica Udruženja Grom u njedrima Igmana.





## Dan šehida: Sjećanje na bosanske gazije

Drugi dan Ramazanskog bajrama je i Dan šehida. Općina Hadžići i Udruženje organizacija porodica, šehida i poginulih boraca općine Hadžići su odali počast gazijama: Igman, Brezovača, Kopišanj, Žunovnica, Musići, Donji Hadžići, Binježevo, Grivići, Kućice, Vrančići, Mokrine, Kahrimani, Osenik, Budmolići, Japalaci,

Vrbanja, Trzanj, Raštelica i Vukovići. Dan šehida je dan sjećanja na sve one koji su se svojim hrabrim podvizima i plemenitošću u odbrani Bosne i Hercegovine uzdigli do najsvjetlijih primjera boraca za pravdu, istinu i dostojanstvo. Dan šehida u BiH ustanovljen je odlukom Rijaseta Islamske zajednice u BiH 23. januara 1995. godine



## Obilježena 25. godišnjica stradanja mještana Donjih Hadžića

Krajem juna, prije 25 godina, srpsko-crnogorski agresor u naselju Donji Hadžići započeo je svoj krvavi pir zarobljavanjem i ubijanjem Bošnjačkih civila. Od 30. juna 1992. godine će mučki ubiti 68 muslimana, žena, djece, staraca na njihovim kućnim pragovima i njihovim imanima. Ovo je najsvirepiji zločin koji mještani ovog kraja pamte. Njima je na spomen-obilježju Donji Hadžići pročten Jasin, Fatiha i položeno cvijeće u znak trajnog sjećanja.

- Ovih 68 ubijenih, svi su mi bili rođaci. Sa njima sam odrastao, družio se. Neka im je vječni rahmet. Još uvijek tražimo kosti naših najmilijih. Pozivam

sa ovog mjesta državu Bosnu i Hercegovinu, pravosudne organe da pokrenu sveobuhvatnu istragu i da se kazne počinioci ovog stravičnog zločina. Niko za ovo još nije odgovarao, mada smo zahvaljujući našoj Općini pokušavali na razne načine da dođemo do informacija. Nudili smo i novac za informaciju o grobnicama, ali uzalud, kazao je Dževad Musić.

U povodu sjećanja na 30. juni 1992. godine cvijeće su položile i Fatihu proučile delegacije Općine Hadžići, boračkih udruženja, predstavnici MZ Donji Hadžići te porodice i prijatelji ubijenih i nestalih.







## „Dani otpora i herojstva “Lokve 92-95“

U organizaciji Općine Hadžići i Udruženja 9.bbr. Hadžići na Lokvama je održana manifestacija pod nazivom „Dani otpora i herojstva Lokve 92-95“. Obilježavanju godišnjice su prisustvovali brojni Hadžićani, članovi šehidskih porodica, predstavnici boračkih udruženja Općine Hadžići, ministar za boračka pitanja KS Muharem Fišo, pomoćnik Općinskog načelnika Izet Koro, predsjedavajući Općinskog vijeća Hadžići Senad Kovačević, zastupnik u Skupštini KS Eldar Čomor. Manifestacija je upriličena u povodu odbrane hadžićkog sela

Lokve, na padinama Igmana, a koje je tokom agresije na Bosnu i Hercegovinu imalo značajnu ulogu za odbranu opkoljenog Sarajeva i BiH. Put kroz Lokve je u periodu od 1992. do 1995. povezivao glavni grad sa ostatkom Bosne i Hercegovine. U mjestu Lokve, u toku agresije živote su dali 24 šehida i dvije civilne žrtve rata. Ovim povodom upriličen je kulturno- umjetnički program nastupima KUD „Ivan Planina“ Tarčin i vrijednih, kreativnih učenika područne Osnovne škole Lokve.



## Obilježena 25. godišnjica formiranja Prvog korpusa Armije RBiH



Polaganjem cvijeća i učenjem Fatihe na šehidskom mezarju Kahrimani u Pazariću 30.augusta obilježena je 25. godišnjica formiranja Prvog korpusa Armije RBiH. Cvijeće su položili predstavnici Koordinacionog odbora boračkih udruženja Hadžići i Općine Hadžići. Na časnom i slavnom putu borbe za slobodu 6.585 pripadnika ove respektabilne vojne formacije ugradilo je živote u temelje države Bosne i Hercegovine. Prvi korpus Armije RBiH sa sjedištem u Sarajevu formiran je 1. septembra ratne 1992. godine u okviru početne reorganizacije i okrupnjavanja

mnogobrojnih novonastalih patriotskih jedinica, jedinica Teritorijalne odbrane i rezervnog sastava MUP-a RBiH, a na prijedlog tadašnjeg načelnika Štaba Vrhovne komande Armije RBiH Sefera Halilovića i po odluci Vrhovne komande (Predsjedništvo RBiH) i prvog predsjednika Alije Izetbegovića. U sastav Prvog korpusa ušle su jedinice sa područja Sarajeva, Kalinovika, Čajniča, Foče, Goražda, Višegrada, Han-Pijeska, Olova, Sokoca, Rogatice, Rudog, Trnova, Ilijaša, Breze, Vareša, Visokog, Fojnice, Kiseljaka i Kreševa. Prvi korpus je 1992. godine brojao 34.500 pripadnika, a taj je broj tri godine poslije narastao na 40.500 boraca. Njih 472 je odlikovano najvišim ratnim priznanjem ‘Zlatni ljiljan’, 19 pripadnika ratnim priznanjem ‘Srebreni štit’, dok je 29 pripadnika odlikovano najvišim državnim priznanjima od Predsjedništva BiH. Tri brigade su u sastavu ovog korpusa odlikovane kolektivnim priznanjem “slavna”, a četiri brigade najvišim kolektivnim priznanjem “viteška”.





## Obilježena 22. godišnjica pogibije osam policajaca

Posljednjeg dana agresije na BiH, 11.10.1995. godine na Treskavici poginulo je osam pripadnika MUP-a R BiH: Selim Tufo, Atif Tufo, Amir Agić, Erik Tiro, Edin Hajro, Rusmir Nikšić, Šaban Muhibić i Šemsudin Čilaš. Tim povodom na spomen-obilježju na Godinjskim brdima – Trnovo odata je počast ovim hrabrim sinovima Bosne i Hercegovine. Cvijeće su položile delegacije Općine Hadžići, boračkih udruženja te saborci i porodice poginulih policajaca. U povodu obilježavanja ovog značajnog datuma odigran je i šahovski turnir u prostorijama ŠK “Bjelašnica” Pazarić, malonogometni turnir učenika osnovnih škola sa područja općine Hadžići, a održan je i čas historije. Obilježavanje ovog značajnog datuma tradicionalno organizuju Udruženje “Veterani policije SJB Hadžići” Hadžići i Općina Hadžići.



## Obilježena 25. godišnjica pogibije komandanta Hikmeta Mehmedića

Polaganjem cvijeća i učenjem Fatihe na spomen-obilježju u Gracu obilježena je 25. godišnjica pogibije Hikmeta Mehmedića Hikca, načelnika Štaba 9. brdske brigade ARBiH. Mehmedić je rođen 11.09.1964. godine u selu Jeleč – Hadžići. Aktivno vojno lice. Poginuo je 20.09.1992. godine na brdu Zagoni, kao vojnik,

na dužnosti načelnika Štaba 9. brdske brigade. Posthumno je 1996. godine odlikovan najvišim ratnim priznanjem „Zlatni ljiljan“. Cvijeće su položile i Fatihu proučile delegacije Općine Hadžići i Koordinacije boračkih udruženja općine Hadžići te porodica Mehmedić.







## Obilježena 25. godišnjica Devete brdske brigade ARBiH



Polaganjem cvijeća, učenjem Fatihe i prigodnim govorima sjećanja na šehidskim mezarjima te spomen-obilježjima obilježena je 25. godišnjica osnivanja 9. brdske brigade Armije Republike BiH. Tim povodom položeno je cvijeće na Centralnom spomen-obilježju ispred zgrade Općine Hadžići, a nakon toga je održana i svečana akademija u hadžićkoj multimedijalnoj sali. Prisutnim se obratio i prezentaciju održao komandant Ešref Bajrektarević te Općinski načelnik Hamdo Ejubović koji je od Udruženja "Devete brdske brigade" primio plaketu u povodu 25. godišnjice. Svoj doprinos u kulturno-zabavnom programu imali su učenici osnovnih škola sa područja općine Hadžići te OŠ "Rakovica" Ilidža. Obilježavanje 25. rođendana 9. brdske brigade, pratila su sportska i literarna

takmičenja, kao i obilazak i polaganje cvijeća na šehidskim mezarjima u Kahrimanima i Mokrinama i spomen-obilježjima ispred osnovnih škola u Tarčinu, Pazariću i Hadžićima, Bukovici i Rakovici. Odlukom predsjednika Predsjedništva RBiH Alije Izetbegovića, 05.11.1992. godine formirana je Deveta brdska brigada ARBiH. Deveta brdska brigada je bila prva organizovana formacija Armije BiH koja je pružila otpor agresoru na teritoriji hadžićke općine. Kroz brigadu je prošao 5.671 borac, od čega su 264 šehida položila živote, a preko 800 njenih pripadnika je teže ili lakše ranjeno. Brigada je ispunila svoju misiju, odbranila slobodnu teritoriju općine Hadžići i „put spasa“ Konjic-Tarčin-Pazarić-Ilidža, kroz „Tunel spasa“ do Sarajeva.







# DAN DRŽAVNOSTI 2017

Povodom Dana državnosti BiH u Multimedijalnoj sali Hadžići u subotu 25.11.2017. godine održana je Svečana akademija Općinskog vijeća Hadžići. Akademiji su pored vijećnika, predstavnika Općine Hadžići, predstavnika kulturnog, javnog, vjerskog i

privrednog života prisustvovali i gosti iz bratske Općine Hadžilar (Turska) na čelu sa načelnikom Doganom Ekidžiom te bivšim načelnikom bratske Općine Meram Konya Dr. Serdarom Kalajdžijem. Kratki čas historije o značaju Dana državnosti održao je profesor Enes Kazazović.







## Otkriveni novi stećci u Pazariću i Mokrinama

Iz Komisije za historizaciju Općine Hadžići  
- Otkriveni novi stećci u Pazariću i Mokrinama -

Otkriće novih stećaka u Pazariću kod Željezničke stanice te u Mokrinama na lokalitetu Kuzmadanj ukazuje da je istraživanje i dokumentovanje kulturnog nasljeđa jednog područja ili regije dugotrajan proces i da, ma koliko se nauka ozbiljno i temeljito bavila tim pitanjem, nikad neće otkriti sve i uvijek ostaje prostora za nova otkrića. Prilikom popisa stećaka na području Hadžića 2015. godine na nekropoli stećaka „Vardište“ u Pazariću, kod Željezničke stanice, evidentirana su četiri stećka. U ljeto ove godine na tom lokalitetu su otkrivena dva nova stećka, a pedesetak metara istočnije od njih u škarpi željezničke pruge još tri nova stećka. Jedan od stećaka otkrivenih u nekropoli „Vardište“, ima oblik klupe, a na njegovoj gornjoj strani, odnosno sjedećem dijelu klupe nalazi se ukras oblika polumjeseca. Prema kazivanju starijih mještana ovog područja, ovaj stećak su mještani, još u vrijeme kada se on nalazio većim dijelom na površini zemlje, zbog njegovog izgleda, zvali klupe.



Na lokalitetu Kuzmadanj u Mokrinama, popisom 2015. g. evidentirana su tri stećka. Obzirom da se, prema tvrdnji i pisanju M. Hadžijahića, na ovom lokalitetu, nekad davno, nalazila crkva Sv. Kuuzme i Damjana, svetaca liječništva,<sup>1</sup> ovaj lokalitet je ostao interesantan za daljnja istraživanja. Tako je tokom ljeta ove godine, pored već evideniranih stećaka, pronađen još jedan prelijep primjerak stećka sljemenjaka sa postoljem. Dug je 190, a visok 95 cm. Širina stećka je oko 100 cm, a dužina postolja oko 230 cm. Ne vide se ukrasi na njemu.



### STEĆAK ILI NIŠAN?

Prilikom istraživanja i popisa kulturno-historijskog nasljeđa iz osmanskog doba na području Hadžića, u Vrančičkom (Fatića ili Dželkinom) mezarju evidentiran je nadgrobni spomenik za koji se nije moglo utvrditi da li se radi o srednjovjekovnom nadgrobnom spomeniku, muslimanskom nadgrobnom spomeniku, ili nečemu trećem.. Predstavnici Komisije za historizaciju općine Hadžići zajedno sa arheolozima sa Filozofskog fakulteta Sarajevo i Instituta za arheologiju Sarajevo<sup>2</sup>, izašli su na lice mjesta u proljeće ove godine. Detaljnim pregledom vidnih dijelova kamene građevine nije se mogla dati preciznija procjena njegove vrste, pripadnosti niti vremenu njegovog nastanka. Na vidljivim dijelovima kamenih ploča od kojih je sagrađena grobnica nisu primijećeni obrisi ornamentalne strukture niti drugih obilježja. Mišljenje stručnjaka arheologije je da je objekat „za grob preuzak i predug“, a o čemu se, zapravo, radi nije se moglo odgonetnuti. Naime, gornja (krovna) kamena ploča je dimenzija ~270 x ~70 cm, i ona u potpunosti pokriva vertikalne ploče. Dimenzija (vidljive) uzdužne vertikalne ploče je ~220 x ~70 cm mada je njena visina znatno veća. Širina čeonih vertikalnih ploča je ~70 cm dok visina prati visinu bočnih ploča. Debljina vertikalnih ploča je u prosjeku oko 15 cm, a krovne ploče oko 20 cm. Unutrašnjost prostora između ploča je približno 225 x 40-50 cm. Ploče su vrlo loše obrade zbog čega bi

<sup>1</sup> Muhamed Hadžijahić, *Razvoj ekonomskih, političkih i kulturnih centara u općini Hadžići do 1878. god., Prilog za proučavanje istorije Sarajeva*, Sarajevo, 1974, 77/78

<sup>2</sup> doc. dr. Adnan Kaljanac i mr. Bujak Edin





se njeni prirodni reljefni oblici mogli protumačiti kao vještački oblikovani ornamenti i ukrasi kojih, zapravo, na ovom objektu nema. Krovna ploča je oštećena na sjeveroistočnoj, njenoj, strani i raspukla je na dva mjesta.



Dilemu oko ovog spomenika smo razriješili zahvaljujući pisanju poznatog arheologa i orjentaliste hafiza S. M. Traljića. Opisujući muslimanske nadgrobne spomenike naše bliske i dalje prošlosti, S. M. Traljić, između ostalog navodi: santrače i kubure kao vrlo rijetke oblike muslimanskih nadgrobnih spomenika. 'Kubura' je sarkofag ili sanduk sačinjen od nekoliko kamenih ploča. Obično je sa svake strane po jedna uspravna ploča, a po vrhu je ili jedna velika, koja pokriva čitavu šupljinu sanduka, ili ih je nekoliko manjih, koje se učvrste željezom ili olovom.<sup>3</sup> Ponekad se na toj ploči ostavi otvor da voda može natapati zemlju u kaburu. Kubure, su preteča modernih sarkofaga ili sanduka različitih oblika na koje se postavljaju nišani.



<sup>3</sup> S. M. Traljić, Muslimanski nadgrobni spomenici, Narodna uždanica, Kalendar za 1940, 194.





SVIM GRAĐANIMA, SARADNICIMA I POSLOVNIM PARTNERIMA  
**SRETNNA I USPJEŠNA NOVA 2018. GODINA.**  
VAŠA OPĆINA HADŽIĆI



[www.hadzici.ba](http://www.hadzici.ba)